

Carta nachindahá Pablo nuú na cúú cuéntá Jesús ndúu ñuu Roma

Cáhan Ndióxi Pablo xihín na cúú cuéntá Jesús

1 Yehe cúú Pablo ta Jesucristo cúú xitoho i. Nacaxi Ndióxi yehe cacuu u in apóstol cuéntá mé á ta nachindahá a yehe cūhun i cáhan i tūhun vaha sahá Jesús nuú ñayivi.

²Sanahá ndivaha nacaja Ndióxi ña ná cahyí na profeta mé á tūhun vaha sahá ini libro yii Ndióxi. ³Mé tūhun vaha yóho cáhan sahá Jesucristo, xitoho í, mé a cúú in tūhún jini já jahyi Ndióxi. Ta nanduu a in ñayivi nacacu ñuyívi yóho ta naquixi a chichi rey David. ⁴Ta najánaha ínima yii Ndióxi ñayivi ña cúú Jesús in tūhún jini já jahyi Ndióxi, mé a cúú cája tóco ndihi ñaha. Jáchí tá sa naxihi Jesús já nanditacu tucu a ta xihín ña yóho náha ña cúú á in tūhún jini já jahyi Ndióxi. ⁵Ta sahá ña nacaja Jesucristo ndica crúxu sahá ña yóho nacaja Ndióxi ñamaní xihín ndihí. Já nachindahá Ndióxi mí ña ná cūhun í cuéntá mé á cáhan í sahá Jesús nu tóco ndihi ñayivi ndúu ñuyívi já ná cuu candeé ini na mé á ta já ná caja na ña cūni a. ⁶Ta mé ndó, na cúú cuéntá Jesús ndúu ñuu Roma jan, nacaxi Ndióxi ndohó cacuu ndó cuéntá mé á.

⁷Ña cán quéa cáhyí i carta yóho nu ndó, na ndúu ñuu Roma jan. Jáchí cūni ndivaha Ndióxi ndohó ta nacaxi a ndohó nduu ndó ñayivi mé á. Ta ná caja Ndióxi, tátá yo xihin Jesucristo, xitoho í cuahá ñamaní xihin ndo ta ná caja ña ná coo vaha ini ndó.

Cūni Pablo cūhun da ñuu Roma coto nihni da na cúú cuéntá Jesús ndúu cán

⁸Ndíquiahva i ndixahvi nu Ndióxi sahá ña nacaja Jesucristo xihín in in ndó jáchí ñayivi ndúu ndijáá ñuyívi xini johó na ña candeé ini ndó Jesús. ⁹Yehe cája chúun i cuéntá Ndióxi ta ndinuhu ini i cáxi tūhun i tūhun vaha sahá Jesús, mé a cúú in tūhún jini já jahyi Ndióxi nuú ñayivi. Ta xini vaha Ndióxi ña tóco ndihi quivi xica tahví i nu mé á sahá ndihi ndó. ¹⁰Ta ndijáá níi quivi xica tahví i nu Ndióxi ña ná quiahva ñamaní nuú i saa i jan coto nihni i ndohó tá cūni a. ¹¹Jáchí cūni cuni i ndohó já ná caxi tūhun i xihin

ndo ndá quiahva cúni ínima yii Ndióxi caja ñamani xihin ndo já ná ndindacú chága ndó cuéntá mé á. ¹²Ña cúni queá ná quiahva tuhun ndeé ini táhan í jáchi in cándéé ini ndihí Ndióxi.

¹³Cúni ña ná candaá ini ndó, ñani mí i, na cúu cuéntá Jesús ña sa cuahá tañu sácu ini i saa i coto nihni i ndohó joo íin cuahá ña sáji nuu nuú i sahá ña cán queá cámani saa i jan. Cúni chindeé e ndohó ña ná caca vaha ndó íchi cuéntá Jesús. Jáchi quiahva já nachindeé e java ga ñayivi, na co cúu chichi Israel. ¹⁴Joo ndítahan nuú i caxi tuhun i tuhun Ndióxi nu tóco ndihi ñayivi ndúu ñuu náhnu xihín na ndúu yucú ñúhú. Ta cahan i tuhun Ndióxi xihín na ndíchí jini ta xihín na co ndíchí jini. ¹⁵Ña cán queá xica ndivaha ini i saa i nu ndúu ndó ñuu Roma jan cahan i tuhun vaha saha Jesús xihin ndo.

Jácacu Ndióxi ñayivi sahá tuhun vaha cahan saha Jesús

¹⁶Co cáchan nuú i sahá tuhun vaha cahan saha Jesús jáchi cúu á ndée Ndióxi jácacu a tóco ndihi ñayivi, na candeé ini mé á. Ta jihna ñúhú nacasáha Ndióxi jácacu a ñayivi naquixi chichi Israel ta viti jácacu a tóco ndihi ñayivi tá candeé ini na mé á vatí cúu ná na toho á cúu ná na Israel. ¹⁷Jáchi náha tuhun Ndióxi nu yo ndá quiahva ndúu ñayivi ndaa nu mé á. Ta cúu á sahá ña cándéé iní mé á ta sahá ña yóho cuití va jáchi coó a inga nuú ña caja í cacuu ñayivi ndaa nu Ndióxi. Já cáchi tuhun Ndióxi já: “Ndá na cúu ñayivi ndaa nu Ndióxi catacu na sahá ña cándéé ini na mé á.”

Tóco ndihi ñayivi ndúu ñuyíví cómi na cuachi nu Ndióxi

¹⁸Janda indiví nu íin Ndióxi xójo ini a xihin tóco ndihi ñayivi cája cuachi ñuyíví yóho ta jándoho a ini na sahá cuachi cája na. Ta sahá ña núu cája na sáji nuu na nuú java ga ñayivi, na cúni candaá ini ña ndaa saha Ndióxi. ¹⁹Jándoho Ndióxi ini ñayivi sahá cuachi cája na jáchi sa najánaha mé á ña ndaa nu ná ta sa xini na saha mé á joo co cándúsa na ña. ²⁰Janda sahá ñuyíví xini ñayivi ña nacavaha Ndióxi ñuyíví xihín indiví xihin tóco ndihi ñaha. Ta xihín ña yóho cuu candaá ini na ña íin Ndióxi ta cuu candaá ini na ña íin ndée mé á caja ña cúni a anda ama cáa quivi. Sahá ña cán queá a cúu cachi na ña co xini na á íin Ndióxi á coó a. ²¹Vatí candaá vaha ini na ña íin Ndióxi joo co cája cáhnu na mé á tátuhun ndítahan nu ná caja na. Ta ni co ndíquiahva na ndixahvi nu á. Ña cája na queá cáhvi núu ini na ta coó saha toho ña cáhvi ini na. Ta cúu ná tátuhun ñayivi tóntó jini, na xica nuu nuú naá yávi. ²²Ta vatí cáchi na cúu ná na ndíchí jini joo cúu ná na tóntó jini. ²³Najándacoo na ña cája cáhnu na Ndióxi, mé a tácu anda ama cáa quivi ta nacavaha na tiniñu yúu ña ñéhe nahná taa, da xihí yachi. Ta nacavaha na nahná laa xihín nahná quíti xihín nahná coo. Ta nacasáha cája cáhnu na ña.

²⁴Sahá ña cán quéa najándacoo Ndióxi na ña ná caja na tá nuú ña núu ña cúni na caja na. Anda jáví ñacasáhá na cája quini na xihín yiquí cuñu táhan na. ²⁵Co xeén na candúsa na ña ndaa cáhan saha Ndióxi joo ñacandúsa na ña tühún. Ta ñacaja cáhnu na ña ñacavaha Ndióxi ta coó ñacaja cáhnu na mé Ndióxi, mé a ñacavaha tóco ndihi ñaha. Jáchí Ndióxi quéa xíní ñúhú caja cáhnu í anda ama cáa quivi. Já ná coo.

²⁶Sahá ña cán quéa najándacoo Ndióxi na ña ná caja na ña xíca ini na caja na, ña co ndítahan caja na. Ta ñaxinu na janda nuú najándacoo najihí ña quíji na xihín yí na ta já ñacasáhá quíji xihín táhan ndaja jíhí mé va na. Ta ña yóho cúu á ña coó ñasacu ini Ndióxi caja na. ²⁷Ta quiahva já ñacaja ri dataa. Najándacoo da ña quíji da xihín ñájihí da ta ñacasáhá ndicají ini da caja da ña núu xihín táhan mé va da janda quiahva ñacasáhá quíji xihín táhan mé dá. Chí nuú cacahan nuu yo quéa cája xihín táhan da. Ta tá nandihí já casáhá ndóho ini yiquí cuñu na saha ña núu cája na.

²⁸Ñaxinu na nuú najándacoo xóo na Ndióxi ta co cúni ga na candaa ini na saha. Sahá ña cán quéa najándacoo xóo Ndióxi na ña ná cahvi núu ini na ta já cája tá cája na ña co ndítahan nu ná caja na. ²⁹Nandicutú ndaa ínima ná xihín tá nuú ña núu, ña cúu cuachi. Ta ndiáva íní na quehe na ñaha cómí inga ñayivi ta cája xíxi na xihín ná ta cáhíhvi ini na ta sáhní na ndíi ta cáni táhan na ta jándahvi na ñayivi ta cáhvi núu ini na saha inga na ta xíca nuu na cáhan tühún na. ³⁰Ta cánahá quini ndivaha na xihín inga na ta cándají na Ndióxi ta yáha yúhu na xihín inga na ta cája ichi ini na ta cája cáhnu na mé va na. Ndiáva íní na ndaja caja chága na cuachi ta sáa ini na caja na ña cúni tátá náná na. ³¹Co xíní túni na ta co jáxinu coo na tühun sahan na nuú ñayivi. Co quíhvi ini na ñani táhan na ta co cája cáhnu ini na saha ná ta co táhnda ini na saha ñayivi. ³²Xíní vaha na ña ñasahnda Ndióxi nu ná ta xíní na ña ndítahan quivi na saha cuachi cája na. Vatí cándaa ini na ña yóho joo xihín ndinuhu ini na cája tá cája na ña núu. Ta janda cájii ini na tá cája java ñayivi mé ña núu.

Caja vií Ndióxi saha tóco ndihi cuachi

2 Méa ndaa cómí ndó cuachi nu Ndióxi. Sándehé ndaa ndó inga ñayivi saha cuachi cája na joo chícaan ndó cuachi jata mé va ndó jáchi cája ndó mé cuachi cán. ²Sa xíní vaha í ña cája ndaa Ndióxi tá jándoho á ini ñayivi saha cuachi cája na. ³Mé ndó sándehé ndaa ndó cuachi cája java ga ñayivi ta cáhan ndo vaha cája Ndióxi tá chíndahá na cuhun na indayá. Joo cáhan ndo ña caja cáhnu ini a saha mé ndó vatí cája ndó mé cuachi cája na cán. ⁴Ndája núu ndó Ndióxi, mé a cúni caja cuahá ñamaní xihín ndo jáchi xíní ndó ña co jándoho yachi Ndióxi ini na cája cuachi. Cúni Ndióxi ña ná ndicó coo ini ndó jándacoo ndó cuachi cája ndó. ⁵Ihvi ndivaha cúu ini ndó

jáchi co jándacoo ndó cuachi cája ndó. Nandicua^hhá cuachi ndó ta jándoho chága Ndióxi ini ndó tá ná tandaa quiví cajúa víí a sahá cuachi nacaja ñayivi. Mé quiví já ndaca náha ña cojo ini mé á sahá cuachi ñayivi ta náha ña íin sahá mé á jándoho a ini na cán. ⁶Mé tiempo cán quiahva Ndióxi nuú in in ñayivi ña ndítahan nu ná ndiquehe na sahá ña nacaja na ñuyíví yóho. ⁷Java ñayivi nacaja na ña vaha xihín ndinuhu ini na ta nacacúni na cajúa na ña ná cajii ini Ndióxi xihín já ná cachi Ndióxi ña cúú ná ñayivi vaha. Ta nacacúni na coo na nu íin Ndióxi anda ama cáa quiví. Ta mé na cán cúú na cuhun coo xihín Ndióxi anda ama cáa quiví. ⁸Joo cojo ini Ndióxi tá jándoho a ini na sáá ini, na co cúni cuhun xoo ña ndaa jáchi cátoó na cuhun na xoo ña núu. ⁹Ndoho ndivaha ini tóco ndihi ñayivi cája cuachi ta cacuéha ndivaha ini na. Jihna ñúhú na naquixi chichi Israel ndoho ini já casáhá ndoho ini na coó naquixi chichi Israel. ¹⁰Joo cajii ini Ndióxi xihín na cája ña vaha ta ndaja cáhnu a na ta cajúa mé á ña ná coo vaha ini ná. Jihna ñúhú já cajúa mé á xihín na naquixi chichi Israel já casáhá cajúa ri a já xihín na coó naquixi chichi Israel.

¹¹Jáchi co cúú á tátuhun cúni Ndióxi in ñayivi ta cándají a inga na jáchi in cúú ndihi ví nu Ndióxi. ¹²Vatí co cándaa ini ñayivi ña sáhndá ley Moisés joo cuhun tá cuhun na indayá sahá cuachi nacaja na. Ta vatí cándaa ini ñayivi ña sáhndá ley Moisés joo cuhun tá cuhun na indayá sahá cuachi nacaja na. ¹³Jáchi tá cándaa ini na ña sáhndá ley Moisés ta co cája na ña jáchi co cáchí Ndióxi ña cúú ná ñayivi ndaa nu mé á. Ta tá cája na ña sáhndá mé ley Moisés anda jáví cáchí Ndióxi ña cúú ná ñayivi ndaa nu mé á. ¹⁴Ñayivi, na coó naquixi chichi Israel co xini na ña sáhndá ley Moisés. Cája mé ná ña sáhndá ley Moisés jáchi já xinu ini na cajúa na ña vatí co xini na mé ley Moisés. ¹⁵Ña cája mé ná náha nuú ñayivi ña nasacu Ndióxi ley mé á ini xini túni ná. Ta xihín xini túni ná cándaa ini na tá cája na ña vaha á tá cája na ña núu. Ta quiahva já xihín mé xini túni ná xini vaha na á cája na cuachi á cája na ña vaha ¹⁶tá ná xinu quiví quiahva Ndióxi chuun nu Jesucristo cajúa víí a sahá ña nacaja tóco ndihi ñayivi vatí nacaja jehé na ña. Jáchi já cáhan tuhun vaha sahá Jesús ña jánaha i nu ndo.

Na naquixi chichi Israel cándúsa na ley Moisés

¹⁷Ta mé ndó cáchí ndo cúú ndó na naquixi chichi Israel, na cándúsa ley Moisés. Ta cáchí ndo cája chága Ndióxi ñamani xihín mé ndó a juú ga xihín java ga ñayivi. ¹⁸Ta cáchí ndo ña sa xini ndó ña cúni Ndióxi cajúa ndó ta cáchí ndo ña sa xini ndó caxi ndó ña vaha jáchi sa najácuaha ndó ley Moisés. ¹⁹Ta cáchí ndó tia^hva vaha ndó chindeé ndó ñayivi ña ná ndihvi na íchi Ndióxi ta cáchí ndo ña cúú ndo tátuhun in lámpara jándiyéhe nuú ñayivi xica nuu nuú naá. ²⁰Ta cáchí ndo ña tia^hva ndó jánaha ndó nuú

ñayivi, na co xini túni ta cáchí ndo ña tiaḥva ndó jánaḥa ndó nuú ñayivi, na cámani catacu vaha ini. Cómí ndo ley Moisés sahá ña cán quea cáhan ndo xini ndó tóco ndihi ña ndaa xihin tóco ndihi ñaha. ²¹Mé ndó jánaḥa ndo ley Moisés nuú ñayivi joo jihna núhú ndítahan caja ndó ña. Mé ndó jánaḥa ndó nuú ñayivi ña a váha toho caja cuíhná na joo cúu ndó na cuihná. ²²Mé ndó jánaḥa ndó nuú ñayivi ña a váha toho coo in ta xihín in ñáñáḥa, ná co cúu ñájíhí da joo íin ndó xihin ñájíhí inga na. Mé ndó co cúní ndó yoco ndindojo veñuhu ñayivi, na coo naquixi chichi Israel joo cája cuíhná ndo ña cuicá ñúhu veñuhu na cán. ²³Cája cáhnu ndó mé va ndó jáchi cómí ndo ley Ndióxi joo co cája cáhnu ndó mé á jáchi co cúní ndó caja ndó ña sáhndá mé ley. ²⁴Ña cán quea ndaa cáhan tuhun Ndióxi saḥa ndó tá cáchí a já: “Ñayivi, na coo naquixi chichi Israel cáhan núu na saḥa Ndióxi sahá ña cája mé ndó, na Israel”, cáchí tuhun Ndióxi.

²⁵Tá cája ndó ña sáhndá ley Moisés já quea ndíyahvi marca nachicaan na yiquí cuñu ndó. Joo tá co cája ndó ña sáhndá ley Moisés já quea co ndíyahvi toho marca nachicaan na yiquí cuñu ndó. ²⁶Na coo naquixi chichi Israel co chicaan toho na mé marca jan yiquí cuñu na joo tá cája na ña sáhndá ley Moisés já ndiquehe Ndióxi na tá quiahva ndiquehe ri mé á na íin marca yiquí cuñu. ²⁷Ndá na cája ña cáchí ley vatí coo naquihvi marca yiquí cuñu na, íin sahá na cán chicaan na cuachi jatá na co cája ña cáchí ley vatí íin a nu ná ta naquihvi marca yiquí cuñu na. ²⁸Ña cán quea tá ná caja in na naquixi chichi Israel mé costumbre ña ná cuni cuití va ñayivi ña já quea a juú ña ndaa ña cúu ná cuéntá Ndióxi. Ta ndá na chicaan na marca yiquí cuñu na co cája na mé costumbre cuéntá yiquí cuñu cuití va na. ²⁹Ta ndá na naquixi chichi Israel tá mé a ndaa cúu ná cuéntá Ndióxi ta cája na ña cúní mé á co cúu á sahá ña nasahnda loho na yiquí cuñu na. Cúu á sahá ña nacaja ínima yii Ndióxi ini na. Ta mé na cán jácavatá na ini Ndióxi jáchi xihin ínima yii mé á cája na ña cúní mé á.

3 Sahá ña cán quea ná ndaca tuhún i ndohó ña yóho: Á íin cuahá chága sahá ñayivi naquixi chichi Israel a juú ga sahá java ga ñayivi. Á ndíyahvi nu Ndióxi ña nachicaan na marca yiquí cuñu na. ²Ajan. Íin cuahá sahá ñayivi naquixi chichi Israel ta tá nachicaan na marca yiquí cuñu na ndíyahvi a nu Ndióxi jáchi nasacu ini a jándacoo a tuhun a nuú na naquixi chichi Israel já ná cacomí na cuéntá sahá. ³Ta vatí ná caja java ñayivi, na cándeé ini mé á ña co cúní mé á caja na joo ama sahá ña cán a ndíjama toho Ndióxi jini á ña ná caja ña núu xihin ná, vaha. ⁴Co cája toho Ndióxi já. Ña cája Ndióxi ní tiempo cúu ndinuhu ña ndaa vatí tóco ndihi ñayivi cáhan na ña tuhún. Já cáchí tuhun Ndióxi já:

Xihín tuhun cáhan Ndióxi cándaa iní ña cúu á Ndióxi ña ndaa

ta a cúu quee vaha na chícāan cuachí jíquí jatá jáchi cúu mé á in Ndióxi ndaa, já cáchi tuhun mé á.

⁵Ta viti ná cahan i xihín ndó tá quiahva cáhán ñayivi ñuyíví. Cáhán na ña co cája vaha Ndióxi tá jándoho a mí sahá cuachí jáchi xihín cuachí jándindita jícó chága yó Ndióxi. Ta xihín ña cája í náha ña cúu Ndióxi in Ndióxi ña ndaa ta mí cúu yó ñayivi cuachi. ⁶Joo co cáhán vaha na jáchi tá co cája ndaa Ndióxi, nduu já queá a cuú caja vií mé á sahá ndihi cuachi cája tóco ndihi ñayivi ndúu ñuyíví.

⁷Já cáchi ñayivi já: “Cóho ná caja yó cuachi já ná candaa chága ini ñayivi ña cája ndaa Ndióxi ta xihín ña yóho caja cáhnu chága na mé á”, cáchi na. Joo co cahan vaha na jáchi tá cáhán yo ña xihín cuachi cája í ndicáhnu chága Ndióxi já queá co cándaa ini ndá saha queá jándoho Ndióxi ini ñayivi sahá cuachi na. ⁸Joo java ñayivi cáchi na: “Cóho ná caja í cuachi já ná caja cáhnu ini mé á sahá cuachí já ndicáhnu chága Ndióxi”, cáchi na joo co cahan vaha na. Ta java ñayivi cahan ihvi na sahá yehe ta chícāan na cuachi jatá i ta cáchi na ña jánaha yehe ña yóho nuú ñayivi. Ndítahan jándoho Ndióxi ini tóco ndihi ñayivi, na jánaha ña yóho.

Tóco ndihi ñayivi ndúu ñuyíví cómí na cuachi nu Ndióxi

⁹Ña cán queá a cuú cachi yó ña cúu mí na vaha chága a juú ga inga ñayivi sahá ña naquixí chichi Israel. Jáchi sa najánaha i nu ndo ña mí, na naquixi chichi Israel xihín na coo naquixi chichi Israel cúu yó ñayivi cája cuachi. ¹⁰Já cáchi tuhun Ndióxi já:

Coó toho ni in ñayivi cája ña ndaa.

¹¹Ta coó toho ni in na cándaa ini ña ndaa, ta coó ni in na ndínducú Ndióxi.

¹²Naaxoo na nu Ndióxi já naquehe na ichí núu cuahan na.

Coó ñayivi cája ña vaha janda ni in túhún na coó.

¹³Quini ndivaha yúhu ná jáchi cúu á tátuhun in yávi ndii ña cámaní ndee núhu.

Cúu ná ñayivi túhún ndivaha.

Tá quiahva cája coo tá tíin rí ñayivi já cája na cán tá cahan na ña tuhún.

¹⁴Ta mé cháhan cuití cahan yúhu ná ta xihín ña yóho jatahvi na ini ñayivi.

¹⁵Níi tiempo ndícajé ini na cahní na ndii ta xíhi ndii cája na.

¹⁶Ta ndá nu xínu na jándoho na ini ñayivi jándacoo ndáhví ñahá na.

¹⁷Ta co xíní na ndá a queá canduu vaha na xihín ñayivi.

¹⁸Ta ni co cándaa ini na ña ndítahan nu ná cayihví na Ndióxi, cáchi tuhun Ndióxi.

¹⁹Sa xini yó ña ndítahan nuú na Israel caja na tóco ndihi ña sáhná ley Moisés jáchi cúu á cuénta na naquixi chichi Israel. Ta xihín ña yóho chícaan ley Moisés cuachi jata mé na cán ta náha ña tóco ndihi ñayivi ndúu ñuyíví cómi na cuachi nu Ndióxi ta a cuú cachi na ña co cómi na cuachi. ²⁰Ni in ñayivi a cúu nduu ndaa na nu Ndióxi sahá ña cája na tóco ndihi ñaha sáhná ley Moisés. Ña cája mé ley quéa ña ná canda iní ña cómi yo cuachi nu Ndióxi.

Jácau Ndióxi mí jáchi cándéé iní mé á

²¹Viti jána Ndióxi nu yo ndá quiahva nduu ndaa yo nu mé á. Ta jári cáchi mé ley xihín na profeta sahá ña yóho. Ta co cúu á sahá ña cája í ña cáchi mé ley ²²joo sahá ña cándéé ini ñayivi Jesucristo já cája Ndióxi ña ná nduu ndaa na nu mé á. Já caja mé á xihín tóco ndihi na cándéé ini Jesucristo jáchi tá quiahva cája Ndióxi xihín na Israel quiahva já cája ri a xihín na co cúu na Israel. ²³Tóco ndihi ñayivi cómi na cuachi nu Ndióxi ta nacaxíca na nu á ta a cuú nduu na ñayivi vaha tá quiahva cúni mé á. ²⁴Joo nacaja Ndióxi in ñamani cáhnu xihín yo já ná nduu ndaa yó nu mé á. Ta coó nachahví sahá jáchi nachahvi Jesucristo sahá cuachi tá naxihi a ndica crúxu. Ta viti co cómi ga yó cuachi nu mé á. ²⁵Nachindahá Ndióxi Jesucristo ña ná cuita nii a sahá cuachi já ná cuu caja cáhnu ini Ndióxi saha yo tá ná cándéé iní Jesucristo. Xihín ña yóho náha ña cúu á in Ndióxi ndaa. Tá camaní quivi Jesucristo sahá cuachi já coó naquehe Ndióxi cuénta sahá cuachi. Já nacaja mé á jáchi cáhnu ndivaha ini a. ²⁶Ta xihín ña yóho náha ña mé a ndaa táhyí cúu á in Ndióxi ña ndaa janda quivi viti. Tóco ndihi na cándéé ini Jesús cúu ná na ndaa nu Ndióxi jáchi najándoo Jesús cuachi na. Ta xihín ña yóho náha ña cúu á Ndióxi ndaa.

²⁷Ndá sahá cája cáhnu í mí, vaha. Ama ná cuu caja cáhnu í mí sahá ña nacaja í. Jáchi a cuú nduu ndaa yó nu Ndióxi sahá ña nasacu vaha í ley Moisés. Cúu á sahá ña cándéé iní Jesús. ²⁸Sahá ña cán quéa sa xini yó viti ña nduu ndaa yó nu Ndióxi tá ná cándéé iní Jesús cuití va. Ta co cúu á sahá ña nasacu vaha í ña sáhná ley Moisés.

²⁹Á cája Ndióxi ña yóho sahá na naquixi chichi Israel cuití va, vaha. Uhun. Jáchi jácau Ndióxi na naquixi chichi Israel xihín na coó naquixi chichi Israel. ³⁰Jáchi íin in tálaá Ndióxi ta mé Ndióxi yóho jácau a ñayivi tá ná cándéé ini na mé á vatí cúu ná na Israel á co cúu toho ná. ³¹Á cacu xoo í ley Moisés, da já. Uhun. Vatí cándéé iní Jesús joo a cuú cacu xoo í ley Moisés jáchi náha ña cúu á ña ndaa ta ndiyahvi a nu yo.

Ña nacaja Abraham sanahá ndivaha

4 Ta ndásaha nacachi Ndióxi sahá Abraham, tásáhnú jícó yo ña nanduu da taa ndaa nu mé á. ²Co cúu á sahá ña nacaja da ña nanduu da taa

ndaa nu Ndióxi já ná a cája cáhnu da mé dá. Ta coó toho ñaha ña cuu caja cáhnu da mé dá saha. ³Jáchí já cáchí tuhun Ndióxi: “Nacandeeé ini Abraham Ndióxi sahá ña cán quea nanduu ndaa da nu mé á”, cáchí tuhun Ndióxi. ⁴Ta viti ná caja í cuéntá cája chúun in dataa. Ta tá nandihí cháhvi na nu dá ta mé jühún cán co cúu á ña jásá na nu dá. Cháhvi na nu dá jáchi cáni a nu dá quehe da ña sahá chuun nacaja da. ⁵Jáchí a cúu ndaja ndaa ñayivi mé ná nu Ndióxi sahá ña cája na. Tá ná candeeé ini ñayivi Jesús, mé a nachahvi sahá cuachí anda jáví ndaja Ndióxi na ñayivi ndaa nu mé á. ⁶Ta quiahva já nacañan rey David sahá ña yóho tá nacachi da ña tahví nahá nacuu da ndaja ndaa Ndióxi vatí coó nacaja da ñaha ña ná cuu ndaja ndaa da mé dá nu Ndióxi. ⁷Já nacachi David já:

Tahví nahá nacuu ñayivi tá nacaja cáhnu ini Ndióxi sahá ña núu nacaja na ta tá najándoo a cuachi na.

⁸Ta tahví nahá nacuu ñayivi tá coó naquehe Ndióxi cuéntá sahá cuachi nacaja na, nacachi David sanahá ndivaha.

⁹Á tahví nahá nacuu na nachicaan marca yiquí cuñu cuití va. Uñun. Jáchi ndúu ndaa ñayivi nu Ndióxi sahá ña cándeeé ini na mé á ta co cúu á sahá ña nachicaan na marca yiquí cuñu á coó a. Ta sa xíní yó ña nacachi Ndióxi ña nanduu Abraham ta ndaa nu mé á sahá ña nacandeeé ini da mé á. ¹⁰Á nacachi Ndióxi ña cúu Abraham ta ndaa nu mé á tá cámaní chicaan da marca yiquí cuñu da á tá nandihí nachicaan da marca yiquí cuñu da. Nacachi a já xihín dá tá cámaní chicaan da marca yiquí cuñu da. ¹¹Jihna ñúhú nacandeeé ini Abraham Ndióxi anda jáví nacachi a ña cúu Abraham ta ndaa nu á. Tá nandihí já nachicaan da in marca yiquí cuñu da já náha ña mé a ndaa nanduu da ta ndaa nu Ndióxi jáchi nacandeeé ini da mé á. Xihín ña yóho naxinu Abraham nanduu da tátuhun tátá tóco ndihí ñayivi, na candeeé ini Ndióxi vatí coó nachicaan na marca yiquí cuñu na. Ta vatí coó nachicaan na mé marca yóho yiquí cuñu na joo cúu ná ñayivi ndaa nu Ndióxi. ¹²Ta quiahva já nanduu Abraham tátá na ín mé marca yiquí cuñu. Ta a juú sahá mé marca yóho cuití va jáchi nanduu da tátá na sahá ña cándeeé cáhnu ini na Ndióxi tá quiahva nacandeeé ini Abraham mé á tá cámaní chicaan da marca yiquí cuñu da.

Jáxinu coo Ndióxi tuhun sahan nu yo tá ná candeeé iní mé á

¹³Sanahá ndivaha nasahan Ndióxi tuhun a nu Abraham xihín nuú na naquixi chichi da. Nacachi Ndióxi ña tandaa quiví ñeñe táhvi ná ña ná nduu ñuyiví ñaha mé ná. Coó nasahan Ndióxi tuhun a nu Abraham sahá ña nacaja da ña sáhdá ley Moisés. Nasahan mé á tuhun a nu dá sahá ña nacandeeé ini da mé á ta já nanduu ndaa da nu Ndióxi. ¹⁴Joo tá mé a ndaa na nasacu vaha ley cúu na ñeñe táhvi cühun indiví já quea coó chuun

cándeé iní Ndióxi, dá já. Jáchi xihín ña yóho jándacoo núu í tūhun nasahan Ndióxi nu yó ña caja mé á xohó. ¹⁵Ndítahan nu Ndióxi jándoho a ini ñayivi tá co caja na ña sáhdá ley Moisés. Joo tá coó toho mé ley já quéa coó toho cuachi ñayivi nu ley.

¹⁶Nasahan Ndióxi tūhun a nu Abraham sahá ña nacandeeé ini da mé á. Ta sahan mé á tūhun a nu yó tá cándeé iní mé á. Coó a caja toho a á caja í ña sáhdá ley Moisés á co caja toho í ña jáchi mé a ndaa ndiquehé ña vaha sahan Ndióxi nu yó tá cándeé iní mé á tátūhun nacandeeé ini Abraham mé á. Ta cúu á tátūhun nanduu Abraham tátá tóco ndihi na cándeé ini Ndióxi.

¹⁷Já cáchi Ndióxi já xihín Abraham: “Nacaja i ña ná nduu mún tátá ñayivi ndúu cuahá nación”, já cáchi tūhun Ndióxi sanahá. Mé Abraham cúu dá tátūhun tátá ndihí nu Ndióxi. Nacandeeé ini da Ndióxi, mé á cuu jánditacu tucu ndii ta xihín tūhun cáhan mé á caja ña ná coo ña coó nasahiin jihna.

¹⁸Vatí coó naxinu nuú tūhun nasahan Ndióxi nu Abraham joo nacandeeé tá nacandeeé ini da Ndióxi ta nasandati da jáxinu coo mé á tūhun a. Já nanduu da chichi nuú naquixi cuahá ñayivi, na ndúu cuahá nación. Já nayaha jáchi já nacachi Ndióxi xihín dá sanahá: “Ndicuahá ndivaha ñayivi quixi chichún”, nacachi Ndióxi xihín dá. ¹⁹Ta nacandeeé ini Abraham Ndióxi ña cacu jahyi da vatí sa nacayati quivi xinu da in ciento cuia ta vatí sa cándaa cáxi ini da ña jalóho cuití va quiví catacu da ñuyiví yóho xihín Sara, ñájíhí da. Ta sa cándaa ini da ña a cuú ga cacu jahyi ná joo nacandeeé ini da Ndióxi. ²⁰Ta coó nacavitá ini da ta coó nandicani ivi johó ini da sahá tūhun nasahan Ndióxi nu dá. Joo nanduu ndeeé chága ví ini da já ná candeeé cáhnu chága ví ini da Ndióxi ta nacaja cáhnu da mé á. ²¹Já naxinu ini da ña mé a ndaa táhyí íin ndée Ndióxi ná jáxinu a tūhun sahan nuú ñayivi. ²²Nacandeeé ini Abraham Ndióxi sahá ña cán quéa nacachi a ña nanduu da taa ndaa nu mé á.

²³Ta tá cáchi tūhun Ndióxi ña nanduu Abraham taa ndaa nu Ndióxi sahá ña nacandeeé ini da mé á já quéa coó nacyhi ña yóho sahá Abraham cuití va. ²⁴Nacyhi ri a saha mí jáchi tá ná candeeé iní Ndióxi, mé á najánditacu Jesús, xitoho í tañu ndii já quéa ndiquehe Ndióxi mí ta ndaja mé á mí ña ná nduú ñayivi ndaa nu mé á. ²⁵Ta nandiquiahva na Jesús ña ná quivi a ndica crúxu sahá cuachí. Ta tá nandihí nanditacu tucu a ña ná nduú ñayivi ndaa nu mé á.

Nacaja Ndióxi ña ná nduu ndaa yó nu mé á

5 Sahá ña cán quéa coó ga cuachi jata yó jáchi nacandeeé iní Ndióxi ta nandique táhan mání yó xihín á sahá ña nacaja Jesucristo, xitoho í.

²Ta sahá ña cándeé iní Jesucristo sahá ña cán quéa caja Ndióxi cuahá ñamaní xohó. Cándeé iní mé á ta cájii iní ndátí cūhun í coo í xihín mé á.

³Ta quiahva já cájii iní tá ná quixi tondóhó nū yō jáchi sa xini yō ña ndindacú chága iní cuéntá Ndióxi tá ndóho í tondóhó. ⁴Tá sa nandindacú iní cuéntá Ndióxi nacaja tondóhó anda jáví táhán ini Ndióxi xihín yō jáchi naxito ndojó mé á mí ta nandindacú chága iní cuéntá mé á. Tá natahan ini Ndióxi xihín yō anda jáví canda vaha iní ña jáxinu coo mé á tuhun nasahan a nū yō. ⁵Tá ndátí ña nasahan Ndióxi tuhun a quiahva nū yō já a cándo nūu toho Ndióxi xihín yō jáchi najándicutú Ndióxi ínima yō xihín ña quíhvi ini a mí. Nacaja Ndióxi ña yóho xihín ínima yii mé á ña nasahan nū yō.

⁶Sahá ña co ndée yō jácacú mí sahá ña cán quéa naxihí Jesucristo saha yō ta coo nacayáncá a quivi a ta ni coo naxihí yachi a. Naxihí a mé quivi nanditahan quivi a sahá cuachi ñayivi quini. ⁷Ihvi ndivaha cáa já queta in ñayivi quivi na sahá inga ñayivi vatí cúú ná na vaha. Joo mé a ndaa cuu queta in ñayivi coo tiaha na quivi na sahá in na cúú na vaha ndivaha.

⁸Náha Ndióxi nū yō ña mé a ndaa táhyí quíhvi ini a mí jáchi vatí cúú yó ñayivi cája cuachi joo naxihí tá naxihí Jesucristo saha yō. ⁹Ta viti sa nanduú ñayivi ndaa nū mé á sahá nii Jesucristo, dó naxita saha yō. Ta sa saha mé á cacu ndaa ínima yō já ná a cójo ini Ndióxi sahá cuachí.

¹⁰Nasacuú na coo naxini táhan vaha xihín Ndióxi joo sahá ña naxihí in túhún jini já jahyi mé á sahá ña cán quéa nandique táhan mání yó xihín á viti. Xihín ña yóho cuu cacu ndaa ínima yō jáchi nanditacu tucu Jesucristo ta sa nandique táhan mání yó xihín Ndióxi viti. ¹¹Ta a juú ña yóho cuití va vaha jáchi cájii ndivaha iní xihín Ndióxi sahá ña nacaja Jesucristo, xitoho í. Sahá ña cán quéa naxinu yó nandique táhan mání yó xihín Ndióxi.

Ña nacaja Adán xihín ña nacaja Jesucristo

¹²Ta sahá cuachi nacaja in taa naní Adán sahá ña cán quéa nandihvi cuachi ñuyíví yóho ta tá nandihvi cuachi ñuyíví já nacasáhá xihí ñayivi. Tóco ndihí cája í cuachi ta sahá ña yóho ndítahan quivi ndihí. ¹³Tá cámani quiahva Ndióxi ley mé á nū Moisés nasacomí tóco ndihí ñayivi cuachi. Joo co quéhe Ndióxi cuéntá sahá cuachi jáchi coo toho ley nasahiin tiempo já. ¹⁴Janda tiempo nasahiin Adán nacasáhá xihí ñayivi sahá cuachi na ta janda naxinu tiempo nasahiin Moisés naxihí na vatí coo nacaja na mé cuachi nacaja Adán. Nasacomí Adán cuachi jáchi naquehe nūu da ña nacachi Ndióxi xihín dá. Ta mé Adán yóho nasacuu da tátuhun yuhú nuú da quixi tá nū ndihí.

¹⁵Joo a cuú jándique táhan í cuachi nacaja Adán xihín tóco ndihí ña vaha sahan Ndióxi nū yō. Jáchi sahá cuachi nacaja in túhún taa, xihí cuahá ndivaha ñayivi. Joo ñamani nacaja Ndióxi xoho sahá ña nacaja in túhún taa naní Jesucristo cúú á in ñamani cáhnu ndivaha ña ñéhe táhvi cuahá

ndivaha ñayivi. ¹⁶A cuú jácatáhan í cuachi ñacaja in dataa xihín ñamani cája Ndióxi xoho jáchi saha in túhún cuachi ñaxinu cháhan jatá ñayivi ta já ñacasáhá xihí na. Vatí ñandicuahá cuachi ñayivi joo ñacaja Ndióxi ñamani xihín ná já ñandaja ndaa mé á na ta ñacachi a ña coó ga cuachi na nu mé á. ¹⁷Sahá cuachi ñacaja in túhún ña naní Adán ñacasáhá xihí ñayivi. Joo sahá ña ñacaja in túhún ña naní Jesucristo ñéhe táhvi yó ndoo máni uun cuachí nu Ndióxi. Jáchi cáhnu ndivaha ñamani cája Ndióxi xoho ña cán queá ñéhe ndeé chága íni yó caca í íchi cuéntá Ndióxi sahá ña ñacaja Jesucristo.

¹⁸Sahá cuachi ñacaja Adán ñacachi Ndióxi ña cómi tóco ndihi ñayivi cuachi nu á. Joo sahá ña ndaa ñacaja Jesucristo ñacachi Ndióxi ña ndá ñayivi ñacuu cuu nduu ndaa na nu mé á jáchi co cómi ga na cuachi nu á.

¹⁹Sáa ñasahíin ini Adán jáchi coó ñaxeén da caja da ña cúní Ndióxi. Ta sahá ña ñacaja Adán cuahá ndivaha ñayivi ñandu na ñayivi cuachi. Joo ñacaja Jesucristo tóco ndihi ña cúní Ndióxi ta xihín ña ñacaja in túhún ña Jesucristo ñandu ndaa cuahá ndivaha ñayivi nu Ndióxi.

²⁰Tá ñasahan Ndióxi ley nu Moisés já ñacandaa ini ñayivi ña cuahá chága cuú cuachi na. Joo tá ñandicuahá cuachi ñayivi já ñatahvi chága ini Ndióxi saha ná. ²¹Ñandihvi cuachi ñuyiví ta ñasacomí a cuéntá sahá ñayivi. Ta sahá ña ñacaja na cuachi sahá ña cán queá ñacasáhá xihí na. Joo ñacaja Ndióxi cuahá ñamani xihín yó ta ñasacomí a cuéntá saha yó já ná cuu nduú ñayivi ndaa nu mé á ta já ná cuu cacu ndaa ínima yó anda ama cáa quiví sahá ña ñacaja Jesucristo, xitoho í.

Ñaxihí yó nuú cuachi joo tácu yó xoo Jesucristo

6 Ama ná cachixihín táhan í: “Cóho caja tá caja í cuachi já ná coo cáhnu chága ini Ndióxi saha yó.” ²Ama ná cachi rí já jáchi cuú yó tátuhun na sa ñaxihí nuú cuachi ta tá sa ñaxihí yó nuú cuachi ama ná cacomí ga cuachi cuéntá saha yó. ³Tá ñacandúta yó cuéntá Jesucristo cuú á tátuhun in yó ñaxihí xihín Jesucristo. ⁴Jáchi tá ñacandúta yó já cuú á tátuhun in yó ñanduxu xihín Jesucristo ta ñaxihí yó nuú cuachi. Ta tá ñajánditacu Ndióxi Jesucristo já cuú á tátuhun in yó ñanditacu xihín mé á. Jáchi xihín ndée cáhnu Ndióxi, tátá yó ñanditacu Jesucristo ta sa xihín mé ndée cán cuu caca í ichí saá viti.

⁵Tá quiahva in ñanduú xihín Jesucristo tá ñaxihí a quiahva já in ñanduú xihín á tá ñanditacu a. ⁶Tá cámani cándeé iní Jesús já ñacatóo ndivaha í cája í cuachi jáchi ñasahnda cuachi chuun nu yó. Joo sahá ña ñaxihí Jesucristo ndica crúxu sahá ña cán queá ñajándacoo í cuachi cája í ta viti co sáhná ga cuachi chuun nu yó. ⁷Jáchi tá sa ñaxihí in dataa co sáhná ga cuachi chuun nu dá ña cán queá cuú á tátuhun sa ñaxihí yó xihín

Jesucristo sahá ña cán quéa co sáhndá ga cuachi chuun nu yó viti. ⁸Ta cúu á tátuhun naxihí yo tá naxihí Jesucristo ña cán quéa xini vaha í ña cūhun yó coo í nu íin mé á anda ama cáa quivi. ⁹Sa xini yo ña nanditacu tucu Jesucristo ta a ndícó coo ga quivi a jáchi ni in ñaha a cuú caja ña ná quivi tucu a. ¹⁰In tálaá tañu naxihí a sahá cuachí ta viti xihín chí nuu co ndítahan ga nu á quivi a sahá cuachí. Ta viti tácu Jesucristo cuéntá Ndióxi. ¹¹Ña cán quéa ndítahan catacu ndó ñuyiví yóho tátuhun na sa naxihí nuú cuachi já ná a cáhndá ga cuachi chuun nu ndo. Ndítahan catacu ndó cuéntá Ndióxi ña in ná nduu ndó xihín Jesucristo.

¹²Ña cán quéa a quiáhva ndó ñamaní nuú cuachi ña ná cacomí a cuéntá sahá yiquí cuñu ndó jáchi tá ná ndiquiahva ndó mé ndó ndahá cuachi já quéa caja ndó cuachi ña xica ini ndó caja ndó. ¹³A ndíquiahva ga ndó yiquí cuñu ndó ndáha cuachi ná a cája ndó ña núu. Joo vaha chága ná ndiquiahva ndó yiquí cuñu ndó ndáha Ndióxi. Nasacuu ndó tátuhun in ndii nu Ndióxi jáchi nacaja ndó cuachi joo viti cúu ndó tátuhun ñayivi, na nanditacu tucu nacaja Ndióxi. Ndítahan ndiquahva ndó mé ndó ndáha Ndióxi ña ná caja ndó ña vaha. ¹⁴Co cómi ga cuachi cuéntá saha ndó viti jáchi tácu ndo sahá ñamaní cája Ndióxi ta co tácu ndo sahá ña sácú vaha ndó ley Moisés.

Ndítahan nu yo ndicaxí ndá íchi candico yo

¹⁵Ama ná caja rí cuachi sahá ña co cómi ga ley Moisés cuéntá saha yo. Uhun. A cája toho í ña jáchi xihín ñamaní cája Ndióxi xihín yo cándaá iní ña cómi mé á cuéntá saha yo. ¹⁶Sa xini ndó ña ndíquiahva in mozo mé dá ndáha xitoho da ta cája da ndá chuun nacuu ña sáhan xitoho da nu dá caja da. Ta viti cuu ndicaxi ndó ndá na cacuu xitoho ndó. Tá ná ndicaxi ndó caja ndó cuachi já quéa cacuu ndó mozo ña quini ta cūhun ndó indayá. Ta tá ná ndicaxi ndó caja ndó ña cúni Ndióxi já quéa cacuu ndó cuéntá mé á ta caja mé á ña ná nduu ndaa ndó nu á viti. ¹⁷Jihna nacaja ndó cuachi cuití va joo ndixahvi Ndióxi jáchi xihín ndinuhu ini ndó cája ndó ña ndaa, ña nacatiahva ndó cuéntá Ndióxi. ¹⁸Nandoo cuachi ndó ta co cúu ga ndó mozo cuéntá cuachi viti. Nanduu ndó mozo cuéntá Ndióxi ta cája ndó ña ndaa viti. ¹⁹Najánaha i sahá in mozo nu ndó já ná candaa vaha chága ini ndó ña ndaa. Mé ndó nasacuu ndó tátuhun mozo jáchi jihna nandiquiahva ndó mé ndó ndahá cuachi ta mí cuachi nasacuu a tátuhun xitoho ndó. Nacaja ndó tá nuú ña núu, ña nacadivi ini ndó caja ndó. Joo viti nandiquiahva ndó mé ndó ndahá Ndióxi ta nasacu ini ndó caja ndó ña ndaa xihín ndinuhu ini ndó jáchi já cáni a nu ndó caja ndó ña ná cacuu ndó ñayivi yii nu mé á.

²⁰Tá nasacuu ndó mozo cuachi coó naxeén ndó caja ndó ña ndaa ña cúni Ndióxi. ²¹Ni in ña vaha coó nañeñe ndó saha cuachi nacaja ndó. Ta

viti cácahan nuu ndo saha mé cuachi nacaja ndó. Ta ndá ñayivi sá cája cuachi cuhun na coo na indayá anda ama cáa quivi. ²²Joo co cómi ga cuachi cuénta saha ndo viti jáchi nanduu Ndióxi xitoho ndó. Vaha quehe ndó tá ná caja ndó ña cuni mé á jáchi já xinu coo ndó cacuu ndó ñayivi yii nu Ndióxi ta já cuhun ndó coo ndó xihin mé á anda ama cáa quivi. ²³Jáchi tá cája í cuachi cúu á tátuhun ndíyíca yo nu Ndióxi sahá ña nacaja í ta ini indayá चाहví sahá. Joo ñamaní cája Ndióxi xoho sahá ña naxihi Jesucristo, xitoho í cúu á ña cohó catacú indivi xihin mé á anda ama cáa quivi.

Có cómi ga ley cuénta saha yo

7 Candehé ndo ñani mí i, na cúu cuénta Jesús. Sa xini vaha ndó ley Moisés ta sa xini ndó ña cómi ley cuénta sahá ñayivi nani tácu cuití va na. ²Cúu á tátuhun tá natandaha in ñánaha xihin in dataa já quea cáchi ley cúu ña ñájíhi da anda ná xinu coo quivi quivi da. Joo cáchi mé ley ña tá sa naxihi da co cúu ga ña ñájíhi da. ³Sahá ña cán quea cuu tandaha tucu ña xihin inga ta jáchi co sáhdá ga mé ley chuun nu ña. Ta co cája ña cuachi nu Ndióxi tá ná tandaha tucu ña jáchi sa naxihi va yí ña. Joo tá ná tandaha tucu ña nani tácu yí ña já quea cája ña cuachi nu Ndióxi.

⁴Ta quiahva já ndóho ri ndóhó va ñani mí i, na cúu cuénta Jesús. Cúu á tátuhun naxihi ndó nu ley Moisés ña cán quea co cómi ga mé ley cuénta saha ndo. Ta viti núná nuú Jesucristo cacomí a cuénta saha ndo ña ná cacuu ndó cuénta mé a nanditacu tucu. Ta viti cuu caja í ña vaha, ña cuni Ndióxi. ⁵Tá cámani candeé iní Jesucristo nacaja í ndinuhu ña núu ña nasacahvi iní caja í. Vatí sa xini yó ña cáchi mé ley joo nacaja chaga yó cuachi ña nacahvi iní caja í. Ña cán quea nanditahan nu yó quiví ná cuhun í ndoho iní indayá, nduu. ⁶Joo nacaja Ndióxi ña ná janí yó nuú ña sáhdá ley Moisés ña nasacomí cuénta saha yo. Ta viti núná nu yó caja í ña cuni mé á jáchi nandijama ínima yii Ndióxi mí sahá ña cán quea co cómi ga ley, ña nacahví na jihna cuénta saha yo viti.

Cája tá cája í cuachi vatí candeé iní Jesucristo

⁷Á cuni cachi ña yóho ña a váha toho ley Moisés. Uhun. Ña vaha cúu á jáchi xihin ña cáhan mé ley cánda a vaha iní ndá a cúu cuachi. Já cáchi mé ley já: “A ndiáva toho ini ndó cacomí ndó ñaha cómi inga na”, cáchi a. Ña cán quea cánda iní viti ña a váha toho tá ná caja i já. ⁸Tá ná a cóo toho ley, nduu já quea a cánda iní i ña cúu cuachi. Ta cóo toho cuachi caja i tá cóo ley, nduu. Joo viti cánda iní i ña a váha toho ndiáva iní i cacomí i ñaha ñani táhan i jáchi cáchi ley a cája i ña. Ña cán quea nandihvi cuachi ini i ta nacasáhá cáhvi ini i ndaja caja i cacomí i ñaha inga na. ⁹Tá cámani

candaa ini i ña cáchí ley Moisés já nacahán i cúú u da vaha. Joo tá natandaa quivi natacu ini i xihín ña cáchí ley Moisés anda jáví nacandaa ini i ña ñúhu cuachi ini i ta nacandaa ini i ña cúú u da cája cuachi ta ndítahan nuú i cūhun i indayá sahá. ¹⁰Tá ná cuu caja ñayivi tóco ndihi ña cáchí ley Moisés já cūhun na coo na nu ín Ndióxi anda ama cáa quivi. Joo coó nacuu caja i ña cáchí mé ley sahá ña cán quéa ndítahan nuú i cūhun i indayá sahá. ¹¹Najándahvi cuachi yehe jáchi nacahán i cuu cūhun i indivi sahá ña cája i ña cáchí ley joo sahá ña coó nacuu xinu coo i caja i ña sahá ña cán quéa cūhun i indayá.

¹²Ta yii ndivaha cúú ley Moisés. Ta yii ndivaha cúú tūhun nasahnda Ndióxi caja í. Ta cúú á ña ndaa ta cúú á ña vaha. ¹³Ama ná jáqueta nuu ley yehe ini indayá nani cúú á ña vaha. Uhun. A cúu cuití caja ley jáqueta nuu a yehe ini indayá. Cuachi quéa ndúcú chindahá yehe cūhun i indayá. Nañehe ín cuachi cañehe a yehe cūhun i indayá saha ley. Xihín ña yóho cándaa ini i ña quini ndivaha cúú cuachi ta vaha ndivaha cúú mé ley.

¹⁴Sa xini yo ña cúú ley cuénta Ndióxi joo yehe cúú u in da cája cuachi ta cája i ña núu jáchi mé cuachi cómi a cuénta sahá i. ¹⁵Co cándaa ini i ña cája i jáchi cúni caja i ña vaha joo co cája i ña. Ña cája i quéa mé ñaha ña cándají i. ¹⁶Tá cája i cuachi ña co cúni caja i já cándaa ini i ña vaha cúú ley. ¹⁷Mé a ndaa co cúni caja i cuachi joo cuachi ndácaan ini i cúú á ña jácahan yehe cája i ña. ¹⁸Sa xini ña co ndeé yiquí cuñu i caja ña vaha jáchi coó ña vaha ndácaan ini i. Vatí cúni caja i ña vaha joo co sáhan mé á caja i ña. ¹⁹Cúni caja i ña vaha joo co cája toho i ña. Ña cája i cúú á ña núu ña co cúni caja i. ²⁰Caja i ña co cúni caja i já cándaa ini i ña cuachi ndícaan ini i quéa chindahá nihni a yehe cája i ña núu.

²¹Cándehe ndo ña yóho: Vatí cúni caja i ña vaha joo cája i ña núu jáchi ña cán cuití va xinu ín i caja i. ²²Janda ínima i xinu coo ña catóo i caja i ña cáhan ley Ndióxi. ²³Joo ndácaan inga ñaha ini i ta cáni táhan mé ñaha cán xihín xini túní i. Ta mé ñaha ndácaan ini i cúú á cuachi. Ta cándeé cuachi xihín i já sáhdá a chuun nuú i.

²⁴Ndáhvi nahá nacuu u. Yo cuu jácacu yehe ná a cája ga i cuachi ña cañehe yehe cūhun i indayá. ²⁵Ndíquiahva i ndixahvi nu Ndióxi jáchi xihín ña nacaja Jesucristo, xitoho í cuu jácacu Ndióxi yehe já ná a cája ga i cuachi. Ña cán quéa cándaa ini i ña ndítahan cája i ña sáhdá ley Ndióxi joo cuachi ndícaan ini i sáhdá chuun nuú i.

Ndíco í in íchi nu cája í ña cúni ínima yii Ndióxi

8 Tasahá ña in nanduú xihín Jesucristo sahá ña cán quéa a chínúu Ndióxi cuachi jata yo viti. Jáchi co cája ga í ña xica ini yiquí cuñu í. Ña cája í cúú ña cúni ínima yii Ndióxi. ²Jáchi xihín ña nacaja Jesucristo

najácacu ínima yíi Ndióxi mí ta nasahnú a cuachí já ná a cùhun yó indayá. ³Coó nacuu caja í tóco ndihi ña sáhná ley Moisés ña cán quéa coó nacuu nduu ndaa yó nu Ndióxi xihín mé ley. Ña cán quéa nacaja Ndióxi inga ñaha tá nachindahá mé á Jesucristo, jahyi a. Nanduu Jesucristo in ñayivi ta tá quiahva cácu ñayivi quiahva já nacacu Jesucristo ñuyíví. Ta tá naxihí mé á ndica crúxu já nachahvi a saha tóco ndihi cuachí sahá ña cán quéa co sáhná ga cuachi chuun nu yó. ⁴Ta nacaja Ndióxi ña yóho já ná cuu xinu coo í caja í ña sáhná ley mé á tá ndáca ínima yíi Ndióxi mí. Jiin va caja í viti jáchi co ndúu ga yó ndahá cuachi.

⁵Ñayivi, na cája ña xíca ini yiquí cuñu, na cán cúu na ndícani cuahá ini sahá yiquí cuñu. Joo na cája ña cúní ínima yíi Ndióxi na cán cúu ná ndúcú jácavatá na Ndióxi. ⁶Tá ná ndicani cuahá ini na sahá ña cúní yiquí cuñu na já quéa cùhun na indayá. Joo tá ná ndicani ini na sahá ña cúní ínima yíi Ndióxi já quéa coo vaha ini na ta ñehe táhvi ná cùhun na indiví. ⁷Joo ñayivi ndícani ini saha yiquí cuñu, na cán cúu ná na ihvi Ndióxi jáchi co cúní na caja na ña cáchi ley Ndióxi ta ni a cuú caja na ña. ⁸Sahá ña cán quéa tá cómi cuachi cuéntá saha ná já quéa a cuú caja na ña cájii ini Ndióxi xihín.

⁹Ta tá mé a ndaa ndácaan ínima yíi Ndióxi ini ndó já quéa co ndíco ga ndó íchi cuéntá ña núu, ña nasacaja ndó jihna. Ta viti ndíco ndó íchi vaha ta cája ndó ña cúní Ndióxi. Jáchi ndá na co ndácaan ínima Jesucristo ini, na cán co cúu ná cuéntá mé á. ¹⁰Tá ndácaan Jesucristo ini ínima ndo vaxi quívi quívi yiquí cuñu ndó sahá cuachi nacaja ndó. Joo mé a ndaa catacu ínima ndo nu iin Ndióxi anda ama cáa quívi jáchi nanduu ndaa ndó nu Ndióxi nacaja mé á. ¹¹Nacaja ínima yíi Ndióxi ña ná nditacu tucu Jesucristo ta tá ndácaan ínima yíi Ndióxi ini ínima ndo já tandaa quívi caja mé á ña ná nditacu tucu yiquí cuñu ndó saha mé ínima yíi Ndióxi ndícaan ini ndó.

¹²Candehé ndó ñani mí i, na cúu cuéntá Jesús. Co ndítahan nu ndó caja ndó ña núu, ña xíca ini ndó caja ndó. ¹³Jáchi tá ndinuhu ini ndó caja ndó ña núu, ña xíca ini ndó já quéa ndítahan nu ndó cùhun ndó indayá. Joo tá xihín ndée ínima yíi Ndióxi jándihi ndó sahá ña núu xíca ini ndó caja ndó já quéa vaxi quívi cùhun ndó coo ndó xihín mé á anda ama cáa quívi.

¹⁴Ndá na nandiquiahva mé ndáha ínima yíi Ndióxi ña ná candaca a na, mé a ndaa táhyí cúu ná jahyi Ndióxi. ¹⁵Nasahan Ndióxi ínima yíi mé á nu ndo joo coó nasahan ña nu ndo ña ná catavi nihni a ndohó ta já quixi ña jáyihví a ndohó. Nasahan Ndióxi ínima yíi mé á nu ndo jáchi xihín ña yóho ndája Ndióxi ndohó jahyi mé á ta saha mé ínima yíi yóho cáhan yó xihín Ndióxi ta cáchi yo: “Tátá maní i.” ¹⁶Ta cáchi ínima yíi Ndióxi xihín ínima yo ña mé a ndaa cúu yó jahyi Ndióxi. ¹⁷Ta sahá ña cúu yó jahyi mé

á sahá ña cán quéa ñehe táhvi mí ví ndiquehé ña nacachi Ndióxi quiahva nu yo. Ta sa mé ña ñehe táhvi yo yóho tahnda java ña xihin Jesucristo. Tá ta mé a ndaa táhyí ndoho iní xihin á já quéa tá nandihí cohó coo í xihin mé á indiví ta cán ndicáhnú í xihin á.

¹⁸Coó a caja toho a tá ná ndoho ini í ñuyíví yóho jáchi vaxi quiví ndicáhnú ndivaha í xihin Jesucristo caja Ndióxi. ¹⁹Tócó ndihí ña nacavaha mé á ndátí ndihí a ta ndiáva iní a ña ná tandaa quí quiví cachi Ndióxi ndá ñayivi cúu cuéntá mé á. ²⁰Nacaja Ndióxi ña ná ndoho ini tóco ndihí ña nacavaha mé á. Mé ñaha nacavaha Ndióxi co cúní a ndoho ini a joo sácú ini Ndióxi ña ná ndoho ini tóco ndihí ña nacavaha mé á. Ta ndátí tiahva ndihí ñaha ²¹anda tandaa quiví caja Ndióxi ña janí ña já ná a cácomí ga cuachi cuéntá sahá já ná a tíví ga ña. Ta ñúchí ndivaha mé quiví já tá caji ini tóco ndihí ñaha nacavaha Ndióxi xihin tóco ndihí na cúu jahyi mé á. Jáchi a cácomí ga cuachi cuéntá saha ná. ²²Sa xíní yo ña janda sanahá ndivaha ta anda viti tána ndivaha tóco ndihí ña nacavaha Ndióxi ta ndóho ndivaha ini a tátuhun ndóho ini in ñáñaha tá ndúcú ndéé ña cacu jahyi ña. ²³Ta quiahva já ndóho ri ini mí ví. Ínima yí Ndióxi cúu ña sahan tiahva mé á nu yo já ná candaa iní ndá quiahva íin ña quiahva mé á nu yo chága chí nuu. Ta tána ndivaha í anda quiahva ná yaha ña ndóho iní. Ta ndátí tandaa quiví ndaja Ndióxi tóco ndihí mí ná nduú jahyi mé á já ná ndiquehé yiquí cuñu saá. ²⁴Najácacu Ndióxi mí jáchi nacandee iní mé á vatí coo naxiní ña nacachi mé á quiahva nu yo. Tá xíní cáxí yo in ñaha já cándaa iní ña co xíní ñúhú toho candatí quehé ña jáchi co xíní ñúhú candatí ñaha cómí yo. ²⁵Joo tá ná candatí in ñaha ña co xíní yo já quéa co ndíhi iní nani ndátí ña.

²⁶Tá cávitá iní já chindee ínima yí Ndióxi mí jáchi co tiahva í ndaja caca táhvi yo nu Ndióxi tá quiahva ndítahan caca táhvi yó nu á. Joo sa mé ínima yí Ndióxi yóho tána ta cáhan xihín tuhun ña a cuú cahan yo. Já caja mé á tá xíca táhvi a nu Ndióxi saha yo. ²⁷Ta sa xíní Ndióxi ña cáhvi iní ta sa xíní a ña xíca táhvi ínima yí mé á saha yo. Ña cúní Ndióxi caja saha yo ña jan quéa xíca táhvi ínima yí mé á saha yo, na cúu ñayivi cuéntá mé á.

Ni in ñaha a cúu cahnu a mí tá cándee iní Jesucristo

²⁸Ta sa xíní yo ña tóco ndihí ña ndóho í ndaja Ndióxi ña ná nduu a ña vaha tá quíhvi iní mé á. Jáchi mí cúu yó na sa nasacu ini Ndióxi ña ná caja í ña cúní mé á.

²⁹Ndá ñayivi nacaxi Ndióxi anda saha nacaxi a na ña ná nduu na tátuhun Jesucristo, mé á cúu jahyi Ndióxi. Jáchi cúní Ndióxi ña ná nduu Jesucristo jini nuú ndihí na cúu cuéntá mé á. ³⁰Ta nacana Ndióxi na nacaxi a ña ná cándee ini na mé á. Ta nacaja mé á ña ná nduu ndaa na nu á. Ta vaxi quiví caja mé á ña ná ndináhnú ndihí na cán xihin á.

³¹Ndiá cachí sahá ña yóho. Ni in túhún ñaha a cúu cani táhan xohó ta ni a cúu quee vaha xohó jáchi cuahan Ndióxi xoo í. ³²Ta coó nacajíhnda Ndióxi jahyi a jáchi nandiquiahva Ndióxi Jesucristo, jahyi a ña ná quivi a saha yó. Xihín ña yóho cánda iní ña co ndáhví cúu ini a quiahva tóco ndihi ñaha nu yó. ³³Yo já cuu chícāan cuachi jatá na nacaxi Ndióxi. Ni in ñayivi a cúu chícāan cuachi jatá na jáchi sa mé Ndióxi nandaja mé á na ñayivi ndaa nu á. ³⁴Yo já cuu jácojo cuachi jatá na cúu cuéntá mé á. Ni in ñayivi jáchi naxihí Jesucristo saha yó. Nanditacu tucu a ta íin coo a xoo cuáha Ndióxi indiví xíca tahví a nu Ndióxi saha yó. ³⁵Yo já cuu caji nuu nu Jesucristo quihví ini a mí. Ni in ñaha a cúu caja ña jándacoo Jesucristo ña quihví ini a mí. Vatí ná ndoho ndivaha iní ta vatí ná quixi ña yíhví yó ta vatí ná ndicuita na caja xíxi na xohó ta vatí ná quixi joco ta vatí janda jáhma yó ná ndimaní ta vatí tondóhó vaxi nu yó á ñayivi ndúcú cahní mí joo ni in ña yóho a cúu caji nuu a nu Jesucristo ña quihví ini a mí. ³⁶Já cáchí tuhun Ndióxi já:

Saha Ndióxi sácú ini ñayivi cahní na ndehe ndijáá níi quivi.

Tá quiahva cája na xihín ndicachi, rí cuhun quivi quiahva já cája na xihín nde, cáchí tuhun Ndióxi.

³⁷Vatí ndóho í tóco ndihi ña yóho joo quee vaha tá quee vaha í caja Jesucristo jáchi quihví ini a mí. ³⁸Sa xíní vaha í ña ni in ñaha a cuú caja tavá mí ndáha Jesucristo, mé a quihví ini mí. Ta coó a caja toho a á tácu yó á sa naxihí yó. Ni táto Ndióxi ni ña sáhdá chuun nuú ñayivi ta ni ña ndóho iní viti ni ña ndoho iní chí nuu ³⁹ta ni in ñaha íin indiví ta ni in ñaha íin tixi núhu ta ni in ñaha nacavaha Ndióxi a cuú tavá mí ndáha Ndióxi, mé a quihví ini mí. Ta najánaha Jesucristo, xitoho í nu yó ña quihví ndivaha ini Ndióxi mí.

Ñayivi naquixi chichi Israel cúu na nacaxi Ndióxi

9 Ña ndaa cúu ña cáhan í xihín ndó viti ta co cávaha í ña tuhún jáchi cúu u cuéntá Jesucristo. Sáhdá ínima yíi Ndióxi chuun nu xíní túní í sahá ña cán quéa co cáhan í ña tuhún. ²Íin cuéha ndivaha ini í ta já táhvi ndivaha ini í sahá na Israel. ³Mé a ndaa cúní yehe chindeé e na naquixi chichi nuú naquixi mí í ña ná candeé ini na Jesucristo. Ta janda íin tiaha í cacuu u da chícāan na cháhan jata tá ta xihín ña yóho cuu cacu ndaa ínima ná. Joo a cuú caja í ña. ⁴Mé na cán naquixi na chichi Israel ta nacaxi Ndióxi na já ná nduu na ñayivi cuéntá mé á. Najánaha Ndióxi nu ná ndá quiahva cáhnu cúu mé á. Ta nasahan tuhun a nu ná ña nasacu ini a caja saha ná. Nasahan Ndióxi ley Moisés nu ná ta najánaha mé á na ndaja ndítahan nu ná caja cáhnu na mé á. Nacaxi tuhun a xihín ná sahá ñamaní caja mé á xihín ná chí nuu. ⁵Ta ñayivi Israel naquixi na chichi na

nasanduu sanahá. Ta nacacu Jesucristo chichi mé na cán ta nanduu a in ñayivi. Chí anda ama cáa quivi ná caja cáhnu yó Jesucristo, mé á cúu Ndióxi, mé á cómi cuéntá saha tóco ndihi ñaha. Já ná coo.

⁶A juú cahán ndo ña coo najáxiu Ndióxi tuhun a nasahan nuú na Israel. A juú ndihi ñayivi jan cúu na cuéntá Ndióxi vatí naquixi na chichi Israel.

⁷A juú tóco ndihi na naquixi chichi Abraham cúu ná cuéntá Ndióxi jáchi janda saha nacachi Ndióxi xihin dá: “Ñayivi cuaha quixi chichún cacuu na jahyi Isaac”, cáchi a xihin Abraham. ⁸Ña yóho cuni cachi a ña ni in túhún ñayivi co cúu ná jahyi Ndióxi sahá ña naquixi na chichi Abraham. Na cúu ndusa jahyi Ndióxi cúu ná naquixi chichi Isaac jáchi cuéntá Isaac najáxiu coo Ndióxi tuhun nasahan nu Abraham. ⁹Sanahá ndivaha nasahan Ndióxi tuhun a nu Abraham já cáchi a já: “Xinu cuia já quixi tucu u ta cacu jahyi taa ñájíhún, Sara.”

¹⁰Candehé ndo ná ndicani i nu ndo ña nayaha chága chinuu. Isaac, da cúu tásáhnu jícó yo nasacuu da tátá ndíví taa valí jahyi Rebeca. ¹¹Tá cámani cacu taa cuatí jahyi na já nasacu ini Ndióxi caxi a in a ta cacu xóo a inga vatí a ñaha caja ndíví taa valí ni ña vaha ni ña núu. Já nasacu ini a caja ¹²ta já nacachi a xihin Rebeca: “Jahyún, da cacu chí ivi cahnda chuun nuú da cacu nu cuítí.” ¹³Ta já cáchi tucu tuhun Ndióxi já sahá jahyi Rebeca: “Nacaxi i Jacobo, da nacacu chí ivi caja i ñamani xihin dá joo nasacu xóo i Esaú, da nacacu nu cuítí.” Já nacaja Ndióxi jáchi já nasacu ini a caja.

¹⁴Ama ná cachi rí ña co cája ndaa Ndióxi. A cáchi toho í já. ¹⁵Já nacachi Ndióxi xihin Moisés sanahá: “Tahvi ini i sahá ñayivi joo mí i caxi i yo tahvi ini i saha. Ta tahnda ini i sahá ñayivi, joo mí i caxi i yo tahnda ini i saha”, nacachi Ndióxi sanahá. ¹⁶Ña cán quéa co cája Ndióxi ña cuni ñayivi ta a cúu caja ndusa ñayivi xihin á ña ná tahnda ini a saha ná jáchi táhnda ini a sahá ñayivi, na cuni mé á tahnda ini a saha. ¹⁷Já cáchi tuhun Ndióxi já xihin da cúu rey nuú nación Egipto: “Nandaja i yohó rey jáchi cuni jánaha i nuun ña cuu cája i tóco ndihi ñaha tá cuni já ná candaa ini tóco ndihi ñayivi ndúu ñuyíví ña cáhnu ndivaha cúu yehe”, nacachi Ndióxi. ¹⁸Ña cán quéa tá cuni Ndióxi tahnda ini a sahá ñayivi já cuu tahnda ini a saha ná. Ta tá cuni a ndaja táhyí a ínimá ná já cuu ndaja táhyí a ña.

¹⁹Joo a cuú cachí ña co cája ndaa Ndióxi tá cáchi a ña cómi yo cuachi. Vatí sácú ini Ndióxi ña caja in in ñayivi joo co chindahá a na caja na cuachi. ²⁰Co ndítahan nuú ñayivi ndaja ndichi na Ndióxi sahá ña cája mé á. Jáchi sa xini yo ña co ndítahan nuú in quiji cachi a xihin da cávaha ñaha: “Co catóo i coo i tá quiahva nacavaha ndó yehe.” ²¹A cuú cachi quiji cán já jáchi mé da cávaha quiji cán, cávaha da ña tá quiahva cuni mé dá.

Xihín in mbohla loho ñuhú quíji cuu cávaha da in quiji cacuu a javí á in quiji cuéntá yávi núhu.

²²Ta quiahva já cája Ndióxi xihín ñayivi. Íin tiahva mé á jánaḥa nu ná ña xójo ndivaha ini a sahá cuachi na. Ta íin tiahva mé á jánaḥa nu ná ña cuu caja mé á tóco ndihi ñaha. Joo nacaja ndeé ini Ndióxi ta nasandati a jándoho a ini ñayivi vatí nanditahan nu ná ndoho ini na sahá cuachi na.

²³Mé a ndaa táhnda ini Ndióxi sahá ñayivi ta cúni a jánaḥa nu ná ña cáhnu ndivaha cúu mé á ta cúni a jánaḥa nu ná ndá quiahva quíhvi ini a na. Anda sanahá ndivaha sácú ini a jánaḥa nu yo ndá quiahva cáhnu cacuu yó nu mé á. ²⁴Nacaxi a ñayivi tañu na naquixi chichi Israel ta nacaxi mé á ñayivi tañu na coó naquixi chichi Israel. Ta mí cúu yó na nacaxi a. ²⁵Já nacachi Ndióxi já sanahá ta já nacahyí Oseas ini tuhun Ndióxi:

Tandaa quívi caxi yehe ñayivi, na co cúu cuéntá mí i ta ndaja i na cuéntá mí i.

Ta na coó naquihvi ini i jihna quíhvi ini i na viti.

²⁶Ta sa mé nu ndúu ñayivi, na coó nasacuu cuéntá Ndióxi, cán cūhun mé á caxi a na ta caja ña ná nduu na cuéntá mé á jáchi cúu á in Ndióxi tácu, já cáchi tuhun mé á.

²⁷Ta sahá na naquixi chichi Israel já nacachi Isaías: “Vatí ndícuahá ñayivi Israel tá quiahva cuahá ñutí yuhú tañuhú joo chá va cacuu na cacu ndaa ínima. ²⁸Jáchi jonáa va jáxinu coo Ndióxi tuhun a ta anda javí caja víi a saḥa tóco ndihi ñayivi ndúu ñuyíví”, nacachi Isaías. ²⁹Ta já nacachi tucu Isaías já sanahá:

Tá quiahva nacaja Ndióxi najándihi a sahá ñayivi ñuu Sodoma xihín ñuu Gomorra quiahva já caja Ndióxi jándihi a saḥa yo, nduu.

Joo sahá ña natahvi ini Ndióxi sahá na Israel sahá ña cán quea coó najándihi a saḥa ná, já cáchi tuhun Ndióxi.

Ndítahan nuú na Israel candeé ini na Jesucristo

³⁰Ña cán quea ndícani i nu ndo sahá ñayivi, na coó naquixi chichi Israel. Co ndínducú na nduu ndaa na nu Ndióxi joo tá nacasáhá na candeé ini na Jesucristo já nacaja Ndióxi ña ná nduu ndaa na nu mé á. ³¹Joo ñayivi Israel cája na ña sáhnda ley Moisés xihín ndinuhu ini na jáchi cáhán na cuu nduu ndaa na nu Ndióxi sahá ña sácú vaha na ley Moisés. Joo coó nacuu nduu ndaa na nu Ndióxi xihín ña yóho. ³²Já nandoho na Israel jáchi nanditahan nu ná candeé ini na Jesucristo. Xihín ndinuhu ini na cája na ña cáchi ley joo coó nacuu nduu ndaa na nu Ndióxi xihín ñaha cája na. Ña cán quea cúu ná tátuhun in na nacachihin saḥa xihín yuu cáhnu. ³³Jáchi cáchi tuhun Ndióxi ña cúu Jesucristo tátuhun yuu cáhnu nu cáchihin sahá ñayivi. Já cáchi tuhun Ndióxi já:

Nasacu yehe in yuu tóto cáhnu ñuu Sión ta xihín yuu cáhnu cán cuaha ná cachihin saha.

Joo ndá na ná candeé ini mé a nachindahá i, na cán cúu ná na a cácahan nuu, já nacachi tuhun Ndióxi.

10 Cunijoho vaha ndó, ñani i, na cúu cuéntá Jesús. Jáchí ndinuhu ini i xica tahví i nu Ndióxi sahá ñayivi Israel ña ná candeé ini na Jesús já ná cuu jácacu Ndióxi na nuú cuachi na. ²Mé a ndaa ná cahan i xihín ndo ña cája cáhnu na Israel Ndióxi xihín ndinuhu ini na joo co cándaa cáxi ini na ña cuni Ndióxi caja na. ³Jáchí co xini na ndaja cája Ndióxi ña ná nduu ndaa ñayivi nu mé á sahá ña cán queá ndúcú na nduu ndaa na nu mé á xihín ña cája mé va na. Ta co cuni na ndiquiahva na mé ná ndáha Ndióxi ña ná caja na ña nasacu ini mé á caja na. ⁴Co xini na ña naquixi Jesucristo ta naxihí a saha yo já najáxinu coo a caja ña cáchí ley ña ná nduu ndaa tóco ndihi na candeé ini mé á.

⁵Sanahá ndivaha nacahyí Moisés sahá ñayivi, na cuni nduu ndaa nu Ndióxi xihín ley Moisés. Já cáchí a já: “Ndá na co cómi cuachi nu Ndióxi, na cán cuu nduu ndaa nu mé á ta jácacu a na”, já nacahyí da. ⁶Joo tá ná jácacu Ndióxi mí sahá ña candeé ini mé á já queá co xini ñuhú cuhun yo indivi jánuu í Jesucristo ña ná nuu a chindeé a mí jáchí sa nacaja mé á ña. ⁷Ta co xini ñuhú cuhun yo nu ndúu ínimá ndii ña ná ndiquehé Jesucristo tañu na sa naxihí jáchí mé Jesucristo sa nanditacu tucu a. ⁸Co xini ñuhú cuhun xica nahá yo ndinducú yo Jesucristo jáchí íin yati ndivaha mé á nu yo jáchí íin a xoho. Ta mé tuhun cahan nde yóho cúu á tuhun cahan saha Jesucristo já ná candeé ini ndó mé á. ⁹Ta tá cachún ña cúu Jesús xitohún ta tá cándúsún xihín ndinuhu ínimun ña najánditacu Ndióxi Jesús tañu na naxihí já queá cuu cacu ndaa ínimun. ¹⁰Jáchí tá candeé ini ñayivi Ndióxi xihín ndinuhu ini na já nduu ndaa na caja Ndióxi. Ta tá cahan na xihín java ga ñayivi ña candeé ini na mé á já queá cuu cacu ndaa ínimá ná.

¹¹Já cáchí tuhun Ndióxi já: “Ndá na ná candeé ini Jesús a xinu toho quivi cahan na ña najándahvi Ndióxi na.” ¹²In cúu tóco ndihi ñayivi nu Ndióxi. Tá quiahva jácacu Ndióxi na naquixi chichí Israel quiahva já jácacu a na coo naquixi chichí Israel. Jáchí sa mé Ndióxi cán cúu Ndióxi nu tóco ndihi ñayivi ta co ndáhvi cúu ini a quiahva ñaha nuú na xica tahví nu mé á. ¹³Já cáchí tuhun Ndióxi: “Ndá na ná caca tahví nu Ndióxi ña ná chindeé a na, na cán cacu ndaa ínimá.” ¹⁴Ta ndaja caja na caca tahví na nu Jesús tá tá cámani candeé ini na mé á. Ta ndaja caja na candeé ini na mé á tá a ñaha cuni joho na tuhun vaha cahan saha Jesús. Ta ndaja caja na cuni joho na tuhun vaha saha Jesús tá cámani cuhun in na caxi tuhun na ña nu ná. ¹⁵Ta ndaja caja na cuhun na cahan na tuhun Ndióxi xihín ná tá ta co íin in na chindahá na cuhun na. Já cáchí tuhun Ndióxi já: “Ndaja

ñúchí chá tá xínú coo na ñéhe tuhun vaha saha Ndióxi ña ná coo vaha í xihín mé á.”

¹⁶Joo a juú ndihi ñayivi cándúsa tuhun Ndióxi. Ña yóho cúú á tá quiahva nacachi Isaías: “Ndióxi, mé ndó cúú ndó xitoho nde. Chá cuití ñayivi cándúsa tuhun nacahan nde xihín ná.” ¹⁷Jáchí jihna núhú cáhan na tuhun vaha saha Jesucristo nuú ñayivi ta xihín ña xíní johó na cán jáxinu ini na xihín á. Anda jáví cásahá na cándeé ini na mé á ta cája na ña cúni a.

¹⁸Á sa naxini johó na tuhun vaha cáhan saha Jesús. Ajan. Sa naxini johó na ña. Jáchí já cáchí tuhun Ndióxi já:

Nasahan na cahan na tuhun Ndióxi nuú ñayivi,

ta níí cúú sahá ñuyíví naxinu tuhun cáhan na, já cáchí tuhun Ndióxi.

¹⁹Á nacandaa ini ñayivi Israel ña yóho. Ajan. Cándaa vaha ini ná ña. Jáchí já nacahyí Moisés sanahá:

Ndióxi quea nacachi a: Caja i ña ná candúsa na tóho yehe já ná cahihvi ini na Israel.

Ta cojo ini na xihín na tóho sahá ña cája i ña ná candúsa mé na tóho cán yehe, nacachi tuhun Ndióxi.

²⁰Xihín ña yóho nasahan ndeé ini Isaías cahyí da ña nacachi Ndióxi tá nacachi a já:

Mé na co ndínducú yehe, na cán cúú na nandiñehé yehe.

Ta najánaha i mí i nu ná vatí coó nandaca tuhun na sahá i, nacachi tuhun Ndióxi.

²¹Joo já nacachi Ndióxi sahá ñayivi Israel: “Níí tiempo cúni ndiquehe vaha i ñayivi Israel joo co cúni na quixi na nuú i jáchí sáá ini na ta co cúni na caja na ña cúni”, nacachi tuhun Ndióxi.

Cája Ndióxi ñamaní xihín ñayivi Israel

11 Ta viti ná ndacatuñún i ndohó ña yóho: Á cáhán ndo ña najándacoo ndáha Ndióxi ñayivi Israel. A juú ña ndaa cúú á jáchí sa mé yehe cúú u da Israel, da naquixi chichi Abraham ta naquixi i chichi Benjamín, da nasacuu jahyi ñání jícó Abraham. ²Janda mé saha nacachi Ndióxi ña nacaxi mé á na Israel cacuu na cuéntá mé á ta co cándají a na viti. Sa xíní ndó ña nacachi tuhun Ndióxi sahá da nasacuu profeta Elías. Mé da yóho tá naxica tahví da nu Ndióxi já najácojo da cuachi jatá na Israel. ³Já nacachi da já: “Cándehe ndo Ndióxi, xitoho i. Sa nasahní na profeta cuéntá mé ndó ta nandicani na nu náa ndo. Ta viti nú laá in túhún yehe cuití va cája ña sáhdá ndo. Ta ndúcú na cahní na yehe”, já nacachi Elías xihín Ndióxi. ⁴Ta já nacachi Ndióxi xihín dá: “A juú in tálaá yóho cája ña cúni jáchí ndúu yíi va usa mil taa cája ña cúni ta coó nacaxítí na nuú tiniñu yúu Baal”, nacachi Ndióxi xihín dá. ⁵Quiahva já íin a viti. Ndúu

chá na cája ña cúní Ndióxi jáchi nacaja Ndióxi ñamani xihín ná ta nasacu ini a jácacu a na. ⁶Nacaxi Ndióxi na jáchi natahvi ini a sahá ná. Coó nasacuu a sahá ña nacaja na jáchi tá ná cacuu a sahá ña cája na já co cúu ga ñamani Ndióxi ta ña yóho cúu ña cúní Ndióxi caja.

⁷Ña cán quéa cuahá ndivaha ñayivi Israel coó nanduu ndaa na nu Ndióxi sahá ña nacaja na jáchi nandaja táhyí na ínimá ná. Joo na nacaxi Ndióxi, na cán cúu na nanduu ndaa nu mé á. ⁸Já cáchí tuhun Ndióxi já: “Co cúní na candúsa na Ndióxi sahá ña cán quéa nasaji Ndióxi xíní túní ná chí in ndeé. Ta quiahva já ndaa na janda víti jáchi co cándaa ini na ña cáhan Ndióxi xihín ná.” ⁹Já nacahyí David sanahá:

Ná cahán na ña cuahan vaha na ichí Ndióxi sahá cuahá ñaha cómi na,

ta ná ndoho ini na sahá cuachi cája na.

¹⁰Ta ná cuaá na já ná a cúní na,

ta ná nditojo jata ná nítí tiempo sahá ña vee ndójo na, nacachi David.

Jácacu Ndióxi na coó naquixi chichi Israel

¹¹Ta viti ná ndaca tuhún i ndohó ña yóho: Á cahán ndo ña a cuú cacu ndaa ínimá na Israel. A juú ña ndaa cúu á. Jáchi vatí sáa ini na Israel ta vatí co cúní na candeé ini na Jesús joo xihín ña nacaja na yóho nanuna nuú na tóho cuni johó na tuhun vaha sahá Jesús ta já cuu cacu ndaa ínimá ná nu mé á. Ta sahá ña yóho casáhá na Israel cahihvi ini na xihín na tóho. ¹²Nacaja Ndióxi cuahá ñamani xihín tóco ndihi na tóho jáchi nacaja ña ná cuu ndihvi na íchi cuéntá mé á sahá ña najándacoo na Israel íchi cuéntá mé á. Joo cuahá chága ñamani caja Ndióxi xihín tóco ndihí tá ná xinu quivi ndiquehe na Israel íchi cuéntá mé á.

¹³Joo íin in ñaha ña cúní cahán i xihín ndo, na tóho. Ndióxi quéa nachindahá yehe tañu ndóhó, na coó naquixi chichi Israel ta chuun cáhnu ndivaha quéa ndójo i xíní i. ¹⁴Jáchi ña cúní mí i quéa ná cahihvi ini na Israel xihín ndo sahá tuhun Ndióxi ta já ná ndinducú mé ná Ndióxi já ná cacu ndaa ínimá na Israel nu Ndióxi jáchi mé ná cúu ná chichi nuú naquixi mí i. ¹⁵Nasacu xóo tóo Ndióxi na naquixi chichi Israel jáchi nasacu ini a jándique táhan mání á tóco ndihi ñayivi ndúu ñuyíví xihín mé á. Ta tá ná xinu quivi casáhá na Israel ndiquehe na tuhun Ndióxi cacuu a in ñaha ñúchí ndivaha. Cacuu a tátuhun casáhá nditacu tucu na jáchi viti cúu ná tátuhun na naxihi jáchi coó naxeén na ndiquehe na tuhun Ndióxi.

¹⁶Abraham nasacuu da cuéntá Ndióxi ña cán quéa jahyi da, na nacacu chichi da cúu ná ñayivi cuéntá Ndióxi. Abraham, da cúu cuéntá mé á cúu dá tátuhun yóho in yitó olivo. Ta ñayivi nacacu chichi da cúu ná cuéntá mé á ta cúu ná tátuhun ndáha mé yitó olivo cán.

¹⁷Cúú á tátuhun nasahnda Ndióxi java ndáha, dó vaha ta nachitivi ndaa mé á ndáha yitó olivo yúcu mé nuú nasahiin ndáha cán. Ta viti quiahva dó ndée nu ndáha yitó olivo yúcu cán ña ná catacu dó. Quiahva já nacaja Ndióxi nasacu xóo a na Israel ta nacaja mé á ñamani xihin mé ndó, na tóho já ná nduu ndó cuéntá mé á. Ta viti cája Ndióxi cuahá ñamani xihin ndo tá quiahva cája xihin na Israel. ¹⁸Joo ndóhó, na cúú na tóho a cáhán ndo ña vaha chága mé ndó a juú ga na Israel. Co ndítahan cahán ndo já. Co cúú ndó tátuhun yohó yító jáchi cúú ndó tátuhun ndáha do. Ta tá co yóho dá já queá a cúu catacu ndáha do. Sahá ña cán queá co ndítahan caja cáhnu ndó mé ndó.

¹⁹A váha cahvi ini ndó ña náhnu chága mé ndó nu Ndióxi a juú ga na Israel sahá ña nasacu xóo mé á na Israel ta nasuná a íchi nu ndóhó candee ini ndó mé á. ²⁰Cándehe ndo. Nasacu xóo Ndióxi na Israel sahá ña coo nacandee ini na mé á ta nandacaxi a ndóhó sahá ña candeé ini ndó mé á ña cán queá co ndítahan caja cáhnu ndó mé ndó. Na ndítahan caja ndó queá cayihví ndo Ndióxi. ²¹Xíní ñúhú ndicuhun ini ndó ña cuu jácaxoo tucu Ndióxi ndohó. Coó natahnda ini a jándacoo xóo a na Israel, mé na nacaxi á. Sahá ña cán queá cachí ga ví mé ndó, na tóho ndaa náha caja Ndióxi cacu xóo tucu a ndohó. ²²Cándehe ndo jáchi táhvi ini Ndióxi sahá ñayivi tá candeé ini na mé á joo cuehe ndivaha mé á xihin na sáa ini. Na cán queá tá co candeé ini ndó mé á ta ni co quíhvi ini ndó a já cacu xóo a ndohó tá quiahva nacaja xihin na Israel. ²³Joo tá ná ndihvi na Israel íchi Ndióxi candee ini na mé á já queá ndiquehe tucu Ndióxi na jáchi cuu caja mé á tóco ndihi ñaha. ²⁴Nandiquehe Ndióxi ndohó vatí nasanduu xícá ndó nu á ta nandaja mé á ndohó cuéntá mé á vatí cúú ndó na tóho. Mé ndó cúú ndó tátuhun ndáha yitó olivo, dó yúcu, dó nachitivi ndaa Ndióxi tóco dó vaha. Ta ña yóho queá a cúu coo já, nduu. Joo nacaja Ndióxi já xihin ndo. Ta ndaa náha cuu caja tucu Ndióxi xihin na Israel ña ndiquehe tucu a na ta cacu tucu a na nu ndahá yító olivo, dó vaha nuú nasandaa na jihna.

Vaxi quivi tá candeé ini na Israel Jesús

²⁵Ñani mí i, na cúú cuéntá Jesús. Cúni ña ná candaa ini ndó ña nasacu ini Ndióxi caja chága chí nuu já ná a cája cáhnu ndó mé ndó. Cuahá na Israel nandaja táhyí na ínima ná ta co cúni na ndiquehe na tuhun Ndióxi. Joo tá sa nandiquehe ndihi na tóho, na nasacu ini Ndióxi jácacu a anda jáví casáhá na Israel ndiquehe na tuhun Ndióxi. ²⁶Anda jáví cacu ndaa ínima ndihi na Israel. Ta já cáhí tuhun Ndióxi sahá ña yóho:

 Nuu Sión quixi in da jácacu ñayivi Israel,
 na naquixi chichi Jacob ná a cája ga na cuachi.

²⁷Ta jándoo i cuachi nacaja na,

tá quiahva nacachi i xihin ná caja i, cáchí Ndióxi.

²⁸Tiempo viti cuahá ndivaha na Israel co cuni na tuhun vaha saha Jesús sahá ña cán quéa co cuni na Ndióxi. Joo cája na ña yóho ña ná núná nu ndóhó, na tóho já ná cuu candeé ini ndó Ndióxi. Vatí cája na Israel ña yóho joo quíhvi ini tá quíhvi ini Ndióxi na sahá tuhun nasahan nu tásáhnú jícó na. ²⁹Tá sahan Ndióxi ña cáchí a quiahva nu yo já quéa co ndímaní mé á nuú tuhun a ta co ndícó coo a cándaa ña sahan nu yo. Ta ni co ndícó coo ini a tá sa nandacaxi a mí. ³⁰Sáa nasahin ini ndóhó, na tóho sanahá joo viti nacaja mé á cuahá ñamaní xihin ndó sahá ña sáa ini na Israel. ³¹Ta vatí sáa ini na Israel viti joo xihín ña yóho núná nu ndóhó, na tóho ndiquehe ndó ñamaní Ndióxi. Joo vaxi quívi tá tahvi ini Ndióxi sahá na Israel tá quiahva natahvi ini a saha ndóhó, na tóho. ³²Nachicaji Ndióxi xíní túni na Israel xihín na tóho ña ná nduu na na sáa ini. Nacaja Ndióxi ña yóho já ná cuu tahvi in nuú ini a saha tóco ndihi ñayivi.

³³Cáhnú ndivaha cúu tóco ndihi ñaha Ndióxi. Ndíchí ndivaha jini mé á ta cándaa ini a tóco ndihi ñaha. Ni in ñayivi a cúu ndicani na ña cáhvi ini Ndióxi. Ta ni in na a cúu cándaa ini ña cája Ndióxi. ³⁴Já cáchí tuhun Ndióxi já: “Ni in ñayivi a cúu cándaa ini na ña cáhvi ini Ndióxi. Ta ni in ñayivi a cúu jácahan na mé á caja ña ndítahan caja. ³⁵Coó ñayivi cája ñamaní xihin Ndióxi ña ná ndaca na ña nu mé á”, cáchí tuhun Ndióxi. ³⁶Jáchí Ndióxi quéa nacavaha tóco ndihi ñaha ta ndúu a saha mé á ta ndúu a cuéntá mé á. Andá ama cáa quívi ná caja cáhnú í Ndióxi. Já ná coo.

Tácú yo caja chúun í cuéntá Ndióxi

12 Natahvi ini Ndióxi saha ndó, ñani mí i, na cúu cuéntá Jesús. Sahá ña cán quéa xíca tahví i nu ndo ña ná ndiquiahva ndó mé ndó ndáha Ndióxi já ná cacuu a tátuhun joco ndó mé ndó nu Ndióxi. Ta caja ndó tóco ndihi ña cuni Ndióxi caja ndó ña ná cajii ini a. Jáchí xihín ña yóho náha ña mé a ndaa táhyí cája cáhnú ndó Ndióxi ta ña yóho cúu á ña ndítahan nu ndó caja ndó. ²A cája ga ndó ña núu ña cája ñayivi ñuyívi. Quiahva ndó ñamaní nu Ndióxi ña ná ndaja vií a xíní túni ndo. Andá javí cándaa ini ndó ña cuni mé á caja ndó. Ta xihín ña yóho cuu caja ndó ña vaha ta cuu caja vatá ndó ini mé á ta cuu caja ndó ña cuni mé á xihín ndinuhu ini ndó.

³Nacaja Ndióxi ñamaní xihín i tá nacaxi a yehe. Ña cán quéa cáhan i xihín ndihi ndó ña co ndítahan cáhan ndo ña cúu ndó na náhnú ndivaha joo ná cahvi ini ndó ña ndaa saha mé va ndó. Ña ndítahan caja ndó quéa coto ndojó ndo mé ndó jáchí nasacu ini Ndióxi ña ná candeé ini ndó mé á já ná cuu caja ndó ña cuni a. ⁴Candehé ndó tá quiahva íin yiquí cuñu í. In túhún cúu yiquí cuñu í joo cuahá nuú ñaha ndáca ta sa jíin sa jíin chuun

cája in in ña ndáca yiquí cuñu í. ⁵Quiahva já ñin tóco ndihí, na cúu cuénta Jesús. Sa jín sa jín chuun cája in in í joo in va cúu yo xihín Jesucristo. Ta sa jín sa jín chuun cája in in í.

⁶Sa jín sa jín chuun nasahan Ndióxi nuú in in í caja í ta mé á nasacu ini a ndá chuun queá quiahva nuú in in í. Sahá ña cán queá tá nasahan Ndióxi chuun nu ndó jáyaha ndó tuhun mé á nuú ñayivi, caja ndó ña xihín ndée mé á jáchi cándeé ini ndó a. ⁷Ta tá nasahan Ndióxi chuun nu ndó ña ná chindeé ndó ñayivi já queá ndítahan nu ndó chindeé vaha ndó na. Ta tá nasahan Ndióxi chuun nu ndó jánaha ndó ñayivi já queá ndítahan nu ndó jánaha vaha ndó na. ⁸Tá ta nasacu Ndióxi ini ínimá ndo quiahva ndó tuhun ndeé ini na, caja ndó ña xihín ndinuhu ini ndó. Ta ndá ñaha jása ndo nuú ñayivi xíní ñúhú cajii ini ndó jása ndó ña. Ta ndá ndó ndójo chuun xíní ñúhú coo cuénta vaha ndó xihín chuun ndójo ndó. Ta ndá ndó cátoó chindeé ñayivi ná cajii ini ndó chindeé ndó na.

Ña ndítahan caja na cúu cuénta Jesús

⁹Xihín ndinuhu ini ndó quihví ini táhan ndó. Candají ndó ña núu ta caja ndó ña vaha xihín ndinuhu ini ndó. ¹⁰Xíní ñúhú quihví ini ndó na cúu cuénta Jesús jáchi cúu ná tátuhun na vehe ndó ta cajii ini ndó tá caja cáhnu táhan ndó.

¹¹Nducú ndée ndo ta a cácuu ndó na jusá ta xihín ndinuhu ini ndó caja chúun ndó cuénta Ndióxi, xitoho í.

¹²Xíní ñúhú cajii ini ndó candatí ndó xinu coo tuhun nasahan Ndióxi nu ndo. Quiahva ndeé vaha ini ndó tá ndóho ini ndó ta a jándacoo ndó ña caca tahví ndo nu Ndióxi.

¹³Ndá ñaha ndímaní nuú java ga na cúu cuénta Jesús ná chindeé ndó na. Ta ndiquehe vaha ndó ñayivi xító nihni ndohó.

¹⁴Caca tahví ndo nu Ndióxi sahá na cája xíxi xihín ndo ña ná caja Ndióxi ñamaní xihín ná. Caca tahví ndo nu Ndióxi saha ná ta a chícaan ndó cháhan jata ná.

¹⁵Cajii ini ndó xihín na cájii ini ta cuacu ndó xihín na sácu.

¹⁶In nuú quihví ini táhan ndó. A cája ichí ini ndó. Ña ndítahan caja ndó queá jánuu ndáha ndó mé ndó xihín ñayivi ndáhví, na co ndíñehe jícó mé. Ta a cáhan ndo ña cúu ndó na ndíchí ndivaha.

¹⁷Tá cája núu na xihín ndó, a ndícó coo ndó caja ndó ña núu xihín ná. Joo nducú ndó quiahva caja ndó ña vaha já ná a cáhan núu ñayivi saha ndo. ¹⁸A nducú ndo cani táhan ndó xihín ñayivi ta ndihí ini ndó coo vaha ndó xihín ndihi na. ¹⁹Ñani mí i, na cúu cuénta Jesús. Tá cája xíxi na xihín ndo a nducú ñehe toho ndó ña núu nu ná jáchi cojo ini Ndióxi xihín na cája já ta ndítahan nu mé á jándoho a ini na. Já cáchí tuhun Ndióxi: “Yehe

ndítahan nuú jándoho i ini ñayivi, na cája ña núu”, cáchí Ndióxi. ²⁰Vaha chága ná caja ndó ña cáchí tuhun Ndióxi: “Tá cuíco ñayivi, na co cúní ndohó quiahva ndó ná cuxu na. Ta tá ichi ini na co cúní ndohó quiahva ndó ticuú nu ná coho na. Tá ná caja ndó ña yóho já queá cacahan nuú na cán sahá ña núu cája na xihín ndó.” ²¹A quiahva ndó ñamaní quee vaha ña quini xihín ndó. Na ndítahan caja ndó queá caja ndó ña vaha já ná cuu quee vaha ndó cahnu ndó ña quini.

13 Xíní ñúhú coojoho ndó nuú ña cáhan na jutixia xihín ndó. Jáchi sáhan Ndióxi ñamaní nuú na cán cahnda na chuun nuú ñayivi. Ta mé Ndióxi queá nasacu a na. ²Ta ndá na co cúní cuni johó nu sáhndá na jutixia cúu ná na sáji nuu nu Ndióxi jáchi Ndióxi queá nasacu a na cán. Ta ndá na co cúní caja ña sáhndá na ndoho ini na. ³Jáchi coó nasacu Ndióxi na jutixia ña ná jáyihví na ñayivi, na cája ña vaha. Nasacu Ndióxi na ña ná jáyihví na ñayivi, na cája ña núu. Tá co cúní ndó cayihví ndó na jutixia xíní ñúhú caja ndó ña vaha já ná caji ini na jutixia xihín ndó. ⁴Nasacu Ndióxi na jutixia ña ná chindeé na ndohó. Joo tá cája ndó ña núu já queá xíní ñúhú cayihví ndó na jáchi mé na cán cahnda na chuun ña ná chahvi ndó sahá ña núu cája ndó. Sahá ña cán nasacu Ndióxi na ña ná jándoho na ini na cája ña núu. ⁵Na cán queá ndítahan nu ndó caja ndó ña sáhndá na jutixia já ná a jándoho na ini ndó jáchi sa náha mé va xíní túni yo cáhan xoho ña xíní ñúhú candúsa í ña sáhndá na jutixia nu yo. ⁶Sahá ña cán queá chahvi ndó jiuhún cuéntá impuesto jáchi sa xíní ndó ña ndítahan nu ndó chahvi ndó ña. Na jutixia cája chúun na cuéntá Ndióxi tá cája na ña xihín ndinuhu ini na.

⁷Ndiquiahva ndó nuú ñayivi ña ndítahan nu ná ndiquehe na. Chahvi ndó impuesto nuú na játaca ña. Caja cáhnu ndó ñayivi, na ndítahan caja cáhnu ndó ta coo toní ñúhú ndó xihín na ndítahan coo toní ñúhú ndó xihín. ⁸A cáyicá ndó ñaha nuú ni in ñayivi. Ña ndíyicá ndó queá quihvi ini táhan ndó. Jáchi ndá na quihvi ini ñayivi, na cán cúu na cája ña sáhndá ley Moisés. ⁹Jáchi tá quihvi ini ndó ñani táhan ndó já queá a ndiáva ini ndó caja ndó ña núu xihín na. Ta a cáhvi ini ndó coo ndó xihín ñájíhí ñani táhan ndó. Ta a cáhni ndó ndíi. Ta a cáhvi ini ndó caja cuíhná ndó ñaha inga na. Ta ni a ndiáva ini ndó cacomí ndó ñaha cómi inga na. Tá quihvi ini ndó ñani táhan ndó já queá cúní cachi a ña cája ndó ña sáhndá ley Moisés tá cáchí a já: “Quihvi ini ndó ñani táhan ndó tá quiahva quihvi ini ndó mé ndó.” ¹⁰Ndá na quihvi ini ñani táhan, na cán cúu na cája vaha xihín ñani táhan na. Ña cán queá tá quihvi ini ñani táhan í já queá jáxinu yó nuú ña sáhndá ley Moisés.

¹¹Saha tóco ndihi ña cáhan i xihín ndó yóho xíní ñúhú candehe ndó ndá quiahva cáa tiempo ndúú viti. Xíní ñúhú ndicaxí vaha ini ndó caja ndó ña

cúni Ndióxi jáchi viti sa nacayati chága quivi jácacu Ndióxi mí a juú ga tá jacá nacandúsa í tuhun Ndióxi. ¹²Cúú á tátuhun ja chá cúni yaha ñuú ta casáhá tivi yaa. Ña yóho cúni cachi a ña sa nacayati quivi quixi tucu Jesucristo. Ña cán quéa xíní ñúhú jándacoo í ña núu cája í tátuhun cája ñayivi xíca nuu naá. Ta xíní ñúhú caja í ña vaha já quéa quee vaha í xihín ña núu. ¹³Ndísáhnu ná coo iní caja í tóco ndihi ñaha tátuhun cúú yó na ndúu nu yéhe. A cácuú ñayivi xíhi ta ni a cája í vicó lándá ndivaha. Ta ni a cáca nuu jii yo xihín ñájíhí ñani táhan í ta a ndiáva iní coo í xihín najíhí. Ta a ndúcú yo cani táhan í xihín ñani táhan í ta ni a cáhíhvi iní xihín ná. ¹⁴Ña ndítahan caja í quéa caca chága yo ndée yo nu Jesucristo, xitoho í já ná cacuu a tátuhun candixí in jahmá caa ña sándixi da cáni táhan. Ta coto a quiáhva ndó ñamaní nuú yiquí cuñu ndó caja ña núu.

Có ndítahan candehé ndaa táhan í

14 Ndiqhehava ndó na cúú cuéntá Jesús vatí co cándaa vaha ini na ña jánaḥa tuhun Ndióxi. Ta a cáni táhan yúhu ndó xihín ná sahá ña cándúsa na. ²Íin java na cúú cuéntá Jesús cáhán na ña cuu cuxu na cuñu, ña najoco na nuú yoco. Joo java na cúú cuéntá Jesús, na saá xihín tuhun Ndióxi cáhán na ña a cúu toho cuxu na cuñu, ña najoco na nuú yoco sahá ña cán quéa co xíxi na ña. ³Na xíxi mé cuñu cán co ndítahan nu ná candehé ndaa na na co xíxi ña ta na co xíxi cuñu cán co ndítahan nu ná candehé ndaa na na xíxi ña. Jáchi ndíquehe vaha Ndióxi ndíví na cán vatí sa jiiin cáhán na. ⁴Ta quiahva já co ndítahan nu ndó candehé ndaa ndó mozo ñani táhan ndó á cája vaha da á co cája vaha da nuú xitoho da. Vaha ri caja vaha da tá vaha ri co cája vaha da jáchi mé va xitoho da cán xíní sahá ña cán. Joo cuu caja Ndióxi ña ná candoo vaha mozo cán nuú xitoho da.

⁵Java ñayivi cáchí na ña íin quivi náhnu chága nuú java ga quivi. Ta java na cáchí na ña in cúú tóco ndihi quivi. Ta ndítahan nuú in in na caxi na ña cáhvi ini na sahá ña yóho. ⁶Tá sácú ini na caxi na in quivi caja cáhnu na Ndióxi ta vaha va cája na. Ta tá cáhán na cuu caja cáhnu na Ndióxi ndá quiví nacuu va ta vaha ri já va. Ta vatí xíxi na cuñu, ña sa najoco na nuú yoco á co xíxi toho na ña joo ndíquiahva na ndixahvi nu Ndióxi sahá ta xihín ña yóho cája cáhnu na mé á.

⁷Ni in yó co tácu saḥa mí ta ni in yó co xíhi saḥa mí. ⁸Ta tá tácu yo á tá naxíhi yo mé a ndaa cúú yó na cómí Ndióxi cuéntá saḥa ta cúú mé á xitoho í. ⁹Sahá ña cán quéa naxíhi Jesucristo ta nanditacu tucu a já nanduu a xitoho ñayivi, na tácu xihín na sa naxíhi.

¹⁰Ña cán quéa a váha toho cája ndó tá sándehe ndaa ndó ñani táhan ndó. A váha caja ndó candají ndó na jáchi vaxi quivi ndique táhan ndihí candita í nu Ndióxi ña caja víí a saḥa yo. ¹¹Jáchi já cáchí tuhun Ndióxi já:

Yóho íin i cáchí i xihín ndo ña xinu quiví ndica xítí tóco ndihi ñayivi nuú i,
ta casáhá na caja cáhnu na yehe, ña cúu Ndióxi, cáchí Ndióxi, xitoho í.

¹²Jáchí nditahan nuú in in í ndiquiahva í cuéntá sahá ña nacaja í nu Ndióxi.

A cája ndó ñaha ña cuu jándicava ñayivi nuú cuachi

¹³Sahá ña cán quéa co ndítahan candehé ndaa táhan í. A cácu ini ndó caja ndó ñaha, ña cuu jándacava na cúu cuéntá Jesús nuú cuachi ta já ná jándacoo na ña cándeé ini na Ndióxi. ¹⁴Sahá ña cándeé ini i Jesús, xitoho i sahá ña cán quéa cándaá vaha ini i ña co cája i cuachi tá xíxi i ña najoco na nuú yoco. Joo tá ndúu na cáhán ña a váha toho cuxu na ña já quéa co ndítahan cuxu na ña jáchí cuu candojo na cuachi sahá tá ná cuxu na ña.

¹⁵Joo tá ndíhíhvi ñanún, na cúu cuéntá Jesús sahá ñaha xísún já quéa cúní cachi a ña cándajún na. Cuéntá coún ná a cájún ña ndicava na cán nuú cuachi sahá ña xísún jáchí cúu ná na naxihí Jesucristo saha. ¹⁶Vatí cándaá ini ndó ña cuu cuxu ndó ña najoco na nuú yoco joo a cúxu toho ndó ña tá ná cahan núu ñayivi sahá ña cája ndó. ¹⁷Jáchí a juú sahá ña xíxi ni sahá ña xíhí cacomí Ndióxi cuéntá saha yo. Ña cúní Ndióxi caja í quéa ná canduu ndaa yo nu mé á ta ná coo vaha iní xihín ñayivi ta ná cajii iní. Tóco ndihi ña yóho cúu á ña quixi nu ínima yíi Ndióxi. ¹⁸Tá ná caja ndó ña yóho já quéa caja cáhnu ndó Jesucristo ta cajii ini Ndióxi caja ndó ta candoo vaha ndó nuú ñayivi.

¹⁹Ña cán quéa xíní ñúhú ndinducú yo tóco ndihi ñaha, ña cuu candaca mí canduu táji yo xihín ñani táhan í ta já ná cuu jácuahnu táhan í xihín ñaha Ndióxi. ²⁰Nasacu ini Ndióxi jácacu a ñayivi sahá ña cán quéa coto a cájí nuu ndó nuú ña cúní Ndióxi caja sahá ñaha xíxi ndó. Mé a ndaa tóco ndihi ñaha cúu á ña vaha cuxú. Ña co váha quéa jándacava í ñayivi nuú cuachi sahá ña xíxi. ²¹Vaha chága ná a cúxu ndó cuñu ta ni a cóho ndó vino ta ni a cája ndó inga ñaha ña cuu jándacava ñani táhan ndó nuú cuachi. ²²Tá ta cándaá cáxí ini ndó ña co cája ndó cuachi nu Ndióxi, a ndícani ndó ña nuú java ga ñayivi. Jáchí tahví nacuu ñayivi tá xíní na co cája na cuachi nu Ndióxi. ²³Joo ndá na ndúcú cuxu in ñaha ta cáhvi ivi johó ini na xihín á tá xíxi na ña já quéa xínu cuachi jata ná. Jáchí ndá ñaha nacuu ná caja í ta tá ta cándúsa yó ña cúu á cuachi já quéa xínu a cacuu a cuachi nu yo.

Chindeé ndó na cáhvi ivi johó ini

15 Tá ndacúcuahan yó xihín tuhun Ndióxi já quéa co ndítahan cacu xóo í na vitá xihín tuhun Ndióxi. A ndúcú ndo caja ndó ña

jándivaha ini mé cuití va ndó. ²Tóco ndihí xíní ñúhú caja í ñaha ña táhan ini ñani táhan í xihín. Ta xíní ñúhú caja í ña já ná chindeé yó ña ña ná canduu vaha na ta já ná cuu cuahnu chága ña xihín tuhun Ndióxi. ³Jáchí mé Jesucristo coó nanducú a caja ña táhan ini mé cuití a. Ña ñacaja mé á quéa najáxinu coo a nuú tuhun Ndióxi tá ñacachi a já: “Tuhun núu ña najácana na nu mé ndó naxinu ri a jatá yehe viti.” ⁴Tóco ndihi ña ñacahyi nuú tuhun Ndióxi sanahá ñacahyi a já ná jánahá nu yo ña co ndítahan ndicani iní. Ta, náha ña ndítahan quiahva tuhun ndeé iní nani ndátí jáxinu Ndióxi tuhun nasahan nu yo. ⁵Ndióxi quéa sáhan ndée nu yo ña ná coo cáhnu iní ta sa mé á sáhan tuhun ndeé iní. Ña cúni Ndióxi quéa chindeé a ndohó caja ndó tá quiahva ñacaja Jesucristo ta já in ná nduu xihín táhan ndó. ⁶Ta já in ná jándique táhan ndihí caja cáhnu í Ndióxi, mé a cúu tátá Jesucristo, xitoho í.

Xíní johó ña coó ñaquixi chichi Israel tuhun vaha saha Jesús

⁷Ndiquehe vaha ndó tóco ndihi ña cúu cuéntá Jesús tá quiahva nandiquehe vaha Jesucristo ndohó já ná ndicáhnu Ndióxi. ⁸Ndítahan ndicuhun ini ndó ña ñaquixi Jesucristo chindeé a ñayivi Israel. Ta ñaquixi a jánahá nu ná ña mé a ndaa táhyí jáxinu coo Ndióxi tóco ndihi nuú tuhun ña nasahan nuú tásáhnu jícó yo jáchi co ndímaní Ndióxi nuú tuhun a. ⁹Ta ñaquixi a jácacu a ñayivi, ña coó ñaquixi chichi Israel ña ná caja cáhnu na mé á sahá ñamaní ñacaja mé á xihín ná. Jáchí já cáchí tuhun Ndióxi:

Yehe xihín ña coó ñaquixi chichi Israel caja cáhnu nde ndohó,
Ndióxi,

ta yehe cata i nu ndo caja cáhnu i quivi ndo.

¹⁰Ta íin inga tucu nu cáchí a já:

Ndohó, ña coó ñaquixi chichi Israel xíní ñúhú ndique táhan ndó
cajii ini ndó xihín ña ñaquixi chichi Israel.

¹¹Anda já ñacachi tucu a já:

Tóco ndihi ndó, ña coó ñaquixi chichi Israel caja cáhnu ndó Ndióxi,
xitoho í,

ta ná a jándacoo toho ndihi ñayivi caja cáhnu na Ndióxi.

¹²Tá ñacahyi Isaías nuú tuhun Ndióxi já ñacahyi da tuhun yóho:

Vaxi quivi cacu in da chichi Isaí,

ñá ná cacomí da cuéntá sahá ñayivi, ña coó ñaquixi chichi Israel.

Ta mé ñayivi yóho candeé ini na mé da quixi chichi Isaí cán.

¹³Ndióxi quéa cája ña ná candeé ini ndó mé á ta já cuu jácacu a ndohó. Ná caja mé á ña ná ndicutú ini ndó xihín ña cájii ini ndó ta ná caja mé á ña ná coo vaha ini ndó jáchi candeé ini ndó a. Xihín ndée ínima yii Ndióxi ná quiahva mé á cuahá ndée nu ndó candeé chága ini ndó a.

¹⁴Cándehe ndó ñani i, na cúu cuéntá Jesús. Sa xini vaha i ña nachutú ndo xihín ña vaha ta cánda vaha ini ndó tuhun Ndióxi. Ta xihín ña jan cuu jánahta táhan ndó. ¹⁵Joo tá naahyí i carta yóho nu ndo já nacaja ndeé ini i cáhyí i saha java ñaha jáchi co cuni ña ná ndindójó ndo ña. Cáhyí i ña yóho jáchi nacaja Ndióxi ñamani xihín i ¹⁶cája chúun i cuéntá Jesucristo cáxi tuhun i tuhun vaha saha mé á nuú ñayivi, na coó naquixi chichi Israel. Ta cúu u tátuhun jutú jáchi xíca i cáhan i tuhun Ndióxi xihín ná já ná cuu cacu ndaa ínima ná. Cúu á tátuhun jóco i na nu Ndióxi já ná cajii ini mé á xihín ná ta já ná cuu ndaja ínima yii mé á ña ná nduu na ñayivi víi nu mé á.

¹⁷Ta sahá ña cándúsa i Jesucristo sahá ña cán quéa ndivaha ini i caja chúun i cuéntá Ndióxi. ¹⁸Jáchi sahan ndeé ini i cáhan i sahá ña nacaja Jesucristo tá nacaja chúun mé á yehe ña candaca i na coó naquixi chichi Israel ña ná caja na ña cuni Ndióxi. Ta sahá ña naahan i xihín na cán já naxini johó na ta nacaja na ña cáchi tuhun Ndióxi. ¹⁹Ta sa naxini na ña xitúhún xihín ña náhnu ndivaha nacaja i nu ná xihín ndeé ínima yii Ndióxi. Ta quiahva já nacaxi tuhun i tuhun vaha saha Jesucristo nuú ñayivi ndúu ñuu Jerusalén xihín nu tóco ndihi na ndúu ndijáá ñuu anda estado Ilírico. ²⁰Ña ndúcú u caja i quéa cahan i xihín ñayivi ña cuni Ndióxi jácacu a na. Ta sá cahan i ña yóho nuú ñayivi, na a náha cuni johó saha Jesucristo jáchi co cuni ndíquehe e chuun ña sa najácava sáhá inga na. ²¹Cáhvi ini i ña vaha chága ná cuhun i nuú ñayivi, na coó naxini johó tuhun vaha saha Jesús jáchi já cáchi tuhun Ndióxi já:

Vatí coó naxini johó na tuhun vaha saha mé á joo vaxi quivi xinu
coo na cahan xihín ná,
ña ná cánda ini na ña coó nacanda ini na jihna, cáchi tuhun
Ndióxi.

Sácú ini Pablo cuhun da ñuu Roma

²²Ta sahá chuun cája i yóho coó nacuu saa i coto nihni i ndohó vatí sa cuahá tañu nasacu ini i saa i jan. ²³Joo viti sa najándihi i chuun nacaja i tañu ñayivi ndúu yóho. Ta sa cáhvi ini i saa i coto nihni i ndohó anda sanahá. ²⁴Sahá ña cán quéa sácú ini i saa i coto nihni i ndohó tá ná yaha i cuhun i chí España. Ta tá ná ndihi cajii ini i cuni i ndohó anda javí ndiquehe tucu u íchi cuhun i. Joo cuni ña ná chindeé ndó yehe já ná cuu ndiquehe tucu u íchi cuhun i. ²⁵Joo viti cuhun i chí ñuu Jerusalén chindeé na cúu cuéntá Jesús ndúu cán. ²⁶Jáchi na cúu cuéntá Jesús ndúu estado Macedonia xihín na ndúu estado Acaya nasacu ini na játaca na jiuhún ta chindahá na ña nuú na cúu cuéntá Jesús, na cándahví ndúu ñuu Jerusalén. ²⁷Mé na tóho yóho nasacu ini na caja na ña ta vaha cája na jáchi cáhan na

ñā ndítahan nū ná chāhvi na sahā ñā nācāja nā Israel, mé nā cúú cuéntá Jesús ndúu ñuu Jerusalén xihín ná. Jáchī nasahan nā Israel nācaxi tuhun na tuhun vaha sahā Jesús nū ná. Ta viti ndúcú ñehe nā tóho yóho ñamanī nācāja nā Israel xihín ná. Ñā cán quēā chindeé ñahā nā toho xihín ñā cómī nā. ²⁸Ta tá sa najándihi i caja i chuun yóho ta tá sa nandihī ndiquiahva i jiuhún nataka nā tóho nuú nā cúú cuéntá Jesús ndúu ñuu Jerusalén anda já nūná nuú i cūhun i España ta já yaha i jan coto nihni i ndohó. ²⁹Ta xīnī vaha i ñā tá ná saa i jan caja Jesucristo cuahā ñamanī xihín ndo sahā tuhun vaha cahan i xihín ndo.

³⁰Xíca tahví i nū ndo ñani mí i, nā cúú cuéntá Jesús, ñā in nuú ná caca tahví yō nū Ndióxi sahā chuun cája i. Jáchī cāndeé ini ndó Jesucristo ta quíhvi ini ndo yehe nācāja ínima yīi Ndióxi. ³¹Caca tahví ndo nū á ñā ná chindeé a yehe ná a cája ñayivi, nā cō cándúsa Ndióxi ndúu estado Judea ni in ñaha xihín i. Ta caca tahví ndo nū Ndióxi ñā ná candúsa nā cúú cuéntá Jesús ndúu ñuu Jerusalén cán ndiquehe vaha na jiuhún ñehe cuahan i nū ná. ³²Já quēā tá ná cúni Ndióxi já caji ini i saa i coto nihni i ndohó ta ndiquehe ndeé e nani xíto nihni i ndohó. ³³Ndióxi ná coo xihín ndo ta ná caja mé á ñā ná coo vaha ini ndó. Já ná coo.

Chíndahá Pablo Ndióxi coo nā ndúu ñuu Roma

16 Ja chá va casaa ñā naní Febe, ñā cúú cuéntá Jesús nū ndo. Mé Febe yóho nācāja chúun ñā veñuhu Cencrea. ²Caja ndó ñamanī ndiquehe vaha ndó ñā sahā ñā cúú ñā cuéntá Jesús, xitoho í ta já ndítahan caja nā cāndeé ini Jesús. Chindeé ndó ñā yóho xihín ndihī ñaha ñā cámanī nū ñā jáchī nachindeé ñā cuahā ndivaha ñayivi ta nachindeé ri ñā yehe va.

³Chíndahá i Ndióxi coo Priscila xihín Aquila jáchī in cúú ná xihín i cája chúun na cuéntá Jesucristo. ⁴Mé nā yóho nasahīn tiaha na quivi na já ná cuu cacu yehe tá naquixi tondóhó nuú i. Ta a juú in túhún yehe ndiquiahva ndixahvi nū ná vaha. Tóco ndihī nā cúú cuéntá Jesús, nā coó naquixi chichi Israel ndiquiahva na ndixahvi nū ná. ⁵Ta jári chíndahá i Ndióxi coo nā cúú cuéntá Jesús, nā ndíque táhan vehe Priscila xihín Aquila. Ta cahan Ndióxi ndó xihín Epeneto jáchī quíhvi ndivaha ini i da. Mé dá nasacuu da nū cuítí nandihvi íchī cuéntá Jesús estado Acaya. ⁶Ta cahan Ndióxi ndó xihín María, ñā chindeé cuahā ndohó. ⁷Ta chíndahá i Ndióxi coo Andrónico xihín Junias. Ndíví da yóho cúú dá da naquixi chichi nuú naquixi mí i. Ta in nasañuhu nde vecaa xihín dá. Ta cúú dá da náhnu tañu nā apóstol. Ta jihna ñúhú ndíví mé da yóho nacasáhā cándúsa da Jesucristo a juú ga yehe.

⁸Ta cahan Ndióxi ndó xihín Amplias jáchī quíhvi ndivaha ini i da. Ta in cúú nde cuéntá Jesús. ⁹Ta chíndahá i Ndióxi coo Urbano. In cúú mé dá

xihín nde cája chúun da xihín nde cuéntá Jesucristo. Ta chíndahá i Ndióxi coo Estaquis, da quíhvi ndivaha ini i. ¹⁰Ta chíndahá i Ndióxi coo Apeles jáchi cuahá tañu najánaha da nuú ñayivi ña mé a ndaa táhyí cándéé cáhnu ini da Jesucristo. Ta quiahva já chíndahá i Ndióxi coo na vehe Aristóbulo.

¹¹Ta cañan Ndióxi ndó xihín Herodión jáchi in naquixi nde chichi Israel. Ta cañan Ndióxi ndó xihín na vehe Narciso jáchi cándúsa na Jesús, xitoho í. ¹²Ta cañan Ndióxi ndó xihín Trifena ta xihín Trifosa, na cája chúun cuéntá Jesucristo, xitoho í. Ta cañan Ndióxi ndó xihín Pérsida, jáchi quíhvi ndivaha ini i ña ta cuahá ndivaha nacaja chúun ña cuéntá Jesucristo, xitoho í. ¹³Ta cañan Ndióxi ndó xihín Rufo jáchi cúu dá da cáhnu ndivaha tañu na cúu cuéntá Jesús. Ta cañan Ndióxi ndó xihín náná da jáchi cúu ña tátuhun náná mí i viti. ¹⁴Ta chíndahá i Ndióxi coo Asíncrito xihín Flegonte xihín Hermas xihín Patrobas xihín Hermes. Ta chíndahá i Ndióxi coo tóco ndihi na cúu cuéntá Jesús ndúu xihín na cán. ¹⁵Ta cañan Ndióxi ndó xihín Filólogo xihín Julia xihín Nereo ta xihín quiahva da. Ta cañan Ndióxi ndó xihín Olimpás ta xihín tóco ndihi na cúu cuéntá Jesús ndúu xihín na cán.

¹⁶Ña cúní quéa ná cañan Ndióxi xihín táhan ndó ta ná tatí yúhu táhan ndó ta yíi caja ndó ña. Tóco ndihi na cúu cuéntá Jesús, na táca veñuhu yóho chíndahá na Ndióxi coo ndihi ndó.

¹⁷Cándehe ndó ñani mí i, na cúu cuéntá Jesús. Xíca tahví i nu ndo ña ná coo cuéntá ndó xihín na cátoó ndicahnda ñayivi, na cúu cuéntá Jesús jáchi sájí nuu na nuú na cája ña cúní Ndióxi. Ña cája na jan quéa cáxoo na nuú ña najánaha nde nu ndo. Coto a cátañan ndó xihín ná. ¹⁸Jáchi mé na yóho co cúu ná na cája chúun cuéntá Jesucristo, xitoho í. Ña cája na quéa ndúcú na ña vaha mé cuití va na. Ta xihín tuhun ñúchí ta xihín tuhun vií jándahvi na ñayivi, na co tácu vaha ini. ¹⁹Tóco ndihi ñayivi xíní na ña cája ndó ña cúní Ndióxi ña cán quéa cáji ndivaha ini i. Ña cúní quéa ná ñaha ndó ña ndíchí jini ndo xihín ña vaha cája ndó. Ta a cáñuhu ini ndó caja ndó ña núu. ²⁰Yachi chá jándihi Ndióxi sahá Satanás, rí cúu tiñáhá sacuahá ta já cuu cahnu ndó rí xihín ndée Ndióxi. Cacuu a tátuhun chiníhni saha ndó rí. Ná caja Ndióxi ña ná coo vaha ini ndó. Ta ná caja cuahá Jesucristo, xitoho í ñamaní xihín ndihi ndo.

²¹Chíndahá Timoteo Ndióxi coo ndó ta in cúu dá cája chúun da xihín i. Ta chíndahá rí Lucio xihín Jasón xihín Sosípater Ndióxi coo ndó. Tóco ndihi da yóho naquixi da chichi Israel nuú naquixi mí i.

²²Yehe naní Tercio ta cáhyí i carta yóho ta chíndahá rí yehe va Ndióxi coo ndó cuéntá Jesucristo, xitoho í.

²³Chíndahá Gayo Ndióxi coo ndó. Vehe mé dá íin i ta sa mé yóho táca na cúu cuéntá Jesús. Ta chíndahá rí da naní Erasto Ndióxi coo ndó. Mé

Erasto cómi da cuéntá sahá jiuhún ñuu yóho. Ta chindahá ri Cuarto, da cúu cuéntá Jesús Ndióxi coo ndó.

²⁴Ná caja cuahá Jesucristo, xitoho í ñamaní xihín ndihi ndó. Já ná coo.

Cája cáhnu Pablo Ndióxi

²⁵Coho caja cáhnu í Ndióxi jáchi mé á cuu ndaja ndacú a ndohó xihín tuhun vaha sahá Jesús ña jánaha nde nu ndo. Anda sanahá tá cámani cava sahá sahá ñuyiví nasacu ini Ndióxi jácacu a ndohó ta viti naxinu quivi jánaha mé á ña nu ndo. Nahá ndivaha nasahiin jehé tuhun vaha sahá Jesús. ²⁶Ta viti cándaā iní ña naçahan Ndióxi sahá Jesús nuú na profeta ta na yóho naçahyí na ña nuú tutu. Ta nasahnda Ndióxi chuun nuú na cúu cuéntá mé á ña ná cūhun na caxi tuhun na ña nu tóco ndihi ñayivi ndúu ñuyiví. Ta xihín mé ña yóho naçaja Ndióxi ña ná cuu candeé ini ñayivi mé á ta já ná caja na ña cūni a, mé a tácu anda ama cáa quivi.

²⁷Ta mé cuití va cúu Ndióxi ta mé cuití va ndíchí jini sahá ña cán queá ndítahan caja cáhnu yó a anda ama cáa quivi sahá ña naçaja Jesucristo, xitoho í. Já ná coo.